

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI SELASA : 4 DISEMBER 2018

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 4 DISEMBER 2018 (SELASA)

SOALAN NO. 1

Minta **MENTERI PERTANIAN DAN INDUSTRI ASAS TANI** menyatakan adakah Kementerian sedar bahawa arahan pemberhentian aktiviti transshipment beras di semua pelabuhan seluruh negara akan membuatkan Labuan mengalami keadaan ekonomi seperti 'sudah jatuh ditimpa tangga'. Transshipment beras dari Vietnam ke selatan Filipina adalah satu peluang penting untuk membantu Labuan bertahan dalam kemelut ekonomi yang sedang dialaminya sekarang ini.

JAWAPAN

Tuan Yang Dipertua,

Akta Kawalan Padi dan Beras 1994 (Akta 522) memperuntukkan sebarang aktiviti mengimport beras ke dalam negara memerlukan permit import.

Walaupun bagaimanapun, Akta 522 tidak mempunyai kuasa ke atas aktiviti transshipment kerana aktiviti ini merupakan aktiviti yang dikawal oleh Undang-Undang di bawah Jabatan Kastam Diraja Malaysia.

Walaupun aktiviti transshipment bukanlah di bawah kawalan Akta 522, secara dasarnya aktiviti transshipment dagangan bebas terutamanya yang melibatkan pecah pukal ke kapal-kapal kecil adalah tidak digalakkan disebabkan faktor-faktor berikut:

- i. Terdapat kemungkinan aktiviti ini membuka ruang dan peluang kepada aktiviti penyeludupan beras ke dalam negara;
- ii. Langkah pengawalan Sanitary dan Phytosanitary (SPS) dalam membendung penyebaran serangga perosak serta penyakit; dan
- iii. Permohonan daripada negara-negara jiran seperti Indonesia dan Filipina yang mengawal kemasukan beras ke dalam negara mereka.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : DATUK SERI DR. RONALD KIANDÉE
[BELURAN]**

TARIKH : 4 DISEMBER 2018

**SOALAN : Datuk Seri Dr. Ronald Kiandee
[Beluran]** minta **MENTERI LUAR NEGERI** menyatakan hala tuju dan peranan berterusan yang akan dimainkan oleh Malaysia berkaitan usaha penyelesaian kemelut konflik serantau dan antarabangsa terutama isu Rohingya, Syria dan Palestin.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Beluran atas pertanyaan yang dikemukakan.

Tuan Yang di-Pertua,

2. Berhubung isu Rohingya, pendirian Malaysia adalah jelas; Malaysia menggesa Kerajaan Myanmar untuk mencapai penyelesaian dengan segera dan mapan kepada isu etnik Rohingya di Myanmar demi kepentingan keselamatan dan kestabilan rantau ini.

3. Penyelesaian tersebut harus melibatkan, antara lain, pemberian status kewarganegaraan Myanmar kepada etnik Rohingya, penghantaran pulang (*repatriation*) etnik Rohingya dari Bangladesh ke Myanmar, dan jaminan bahawa semua bentuk penindasan dan kekejaman yang berlaku ke atas etnik Rohingya dihentikan dan individu-individu yang melanggar hak asasi manusia etnik Rohingya diadili mengikut undang-undang antarabangsa.

4. Isu kewarganegaraan etnik Rohingya merupakan antara penyebab utama kepada krisis yang melanda etnik Rohingya. Dalam hal ini, Malaysia telah meminta Myanmar agar lebih fleksibel dalam menangani isu ini, dan menerima etnik Rohingya sebagai sebahagian daripada masyarakat Myanmar. Ini adalah untuk menjamin hak-hak mereka dan memastikan diskriminasi dan kekejaman tidak lagi berulang di masa akan datang.

5. Malaysia juga menggariskan bahawa semua bentuk penindasan dan kekejaman yang dilakukan ke atas etnik Rohingya di Myanmar perlu mendapat keadilan berlandaskan undang-undang antarabangsa. Sebagai ahli masyarakat dunia, Myanmar mempunyai tanggungjawab utama untuk menegakkan prinsip kedaulatan undang-undang di negaranya sendiri. Malaysia juga telah menzahirkan kekecewaan dan menggesa Kerajaan Myanmar untuk menghentikan semua bentuk

penindasan, kekejaman dan diskriminasi yang sedang berlaku ke atas etnik Rohingya di Myanmar.

6. Kita sedia maklum bahawa krisis ini amat sukar diselesaikan dalam masa terdekat. Meskipun begitu, Malaysia terus memainkan peranan di peringkat serantau dan antarabangsa untuk memastikan isu ini sentiasa mendapat perhatian masyarakat dunia. Malaysia serta masyarakat dunia perlu menggesa Myanmar untuk segera memulakan proses repatriasi pelarian Rohingya dari Cox's Bazaar untuk kembali ke Wilayah Rakhine, yang kini telah tertangguh selama 9 bulan. Kerajaan juga akan terus memberikan bantuan kemanusiaan samada secara dua hala dengan Kerajaan Myanmar dan Bangladesh, atau secara bersama dengan negara-negara anggota ASEAN yang lain.

7. Di peringkat antarabangsa, Malaysia terus mengetengahkan isu Rohingya, terutamanya dalam kerangka ASEAN, Pertubuhan Kerjasama Islam (OIC) dan Pertubuhan Bangsa-Bangsa Bersatu (PBB). Walaupun percaturan politik antarabangsa menghalang daripada tindakan konkrit diambil berhubung perkara ini, Malaysia akan terus berusaha ke arah memastikan penyelesaian dicapai berkenaan isu etnik Rohingya.

Tuan Yang di-Pertua,

8. Mengenai situasi di Syria pula, ia merupakan salah satu isu yang kerap dibincangkan di dalam agenda Majlis Keselamatan PBB. Konflik di negara berkenaan yang bermula pada 2011, kini berkembang menjadi krisis bersenjata yang memberi ancaman serius kepada kestabilan serantau dan antarabangsa. Malaysia amat peka dan prihatin terhadap krisis di Syria yang memasuki tahun ke lapan (8) tahun ini. Konflik ini telah mengorbankan ratusan ribu nyawa orang awam dan kesengsaraan yang berpanjangan kepada rakyat Syria.

9. Dalam perkara ini, Malaysia berpendapat bahawa usaha perdamaian antara semua pihak yang terlibat di Syria boleh dicapai melalui konsep kesederhanaan, wassatiyah serta sikap bertolak-ansur antara semua pihak demi kebaikan rakyat Syria keseluruhannya.

10. Malaysia secara konsisten menyuarakan bahawa konflik di Syria akan hanya dapat diselesaikan melalui rundingan dan dialog terangkum yang dipersetujui oleh semua golongan masyarakat Syria. Dalam hal ini, Malaysia menyokong sepenuhnya usaha-usaha pengantaraan (*mediation*) di bawah naungan PBB.

11. Malaysia juga sentiasa menggesa pihak-pihak yang bertelagah di Syria untuk menghormati undang-undang kemanusiaan antarabangsa, termasuk menyediakan laluan bantuan kemanusiaan yang tidak terbatas, dan melindungi infrastruktur awam dan orang-orang awam termasuk kanak-kanak, konvoi misi kemanusiaan, sekolah dan hospital.

Tuan Yang di-Pertua,

12. Sebelum saya menghuraikan usaha-usaha yang diambil oleh Kerajaan Malaysia di persada antarabangsa dalam membela nasib rakyat Palestin daripada kezaliman rejim Israel, saya terlebih dahulu ingin memaklumkan di dalam Dewan yang mulia ini bahawa Kerajaan Malaysia sememangnya amat konsisten dalam pendekatannya apabila berhadapan dengan isu-isu yang melibatkan Palestin ini. Sejak dahulu lagi, Kerajaan Malaysia sentiasa memberi sokongan padu kepada Palestin dan perjuangan rakyatnya sama ada dari segi politik, ekonomi, dan moral.

13. Sebagai sebuah negara yang menyanjung tinggi prinsip kemanusiaan dan keadilan sejagat, Malaysia juga akan terus teguh dengan pendirian sedia ada untuk menyokong hak mutlak rakyat Palestin ke atas penubuhan sebuah negara Palestin yang bebas dan berdaulat, berdasarkan penubuhan dua negara (*Two-State Solution*), Palestin dan Israel, yang wujud secara sebelah menyebelah dengan aman berdasarkan kepada sempadan sebelum tahun 1967, dengan Baitulmaqdis (East Jerusalem) sebagai ibu negara Palestin.

14. Usaha terkini Malaysia di peringkat antarabangsa adalah semasa Mesyuarat Jawatankuasa Enam OIC Mengenai Palestin (*Meeting of the OIC Committee of Six on Palestine*) yang telah diadakan pada 26 September 2018 di sela-sela Perhimpunan Agung PBB yang ke-73.

Ketika mesyuarat tersebut, Malaysia telah mengutuk semua tindakan rejim Israel yang menghalang segala usaha untuk mencapai keamanan melalui penyelesaian dua negara (*Two-State Solution*). Malaysia juga menggesa Negara-negara Anggota OIC untuk mengutuk tindakan kejam Israel serta bersama-sama mempertahankan hak asasi rakyat Palestin dan kedaulatan Baitul Maqdis.

15. Selain itu, Mesyuarat Jawatankuasa Eksekutif Terbuka OIC untuk membincangkan keputusan Sidang Kemuncak Tergempar kali ke-6 dan ke-7 telah diadakan pada 26 September 2018, juga di sela-sela Perhimpunan Agung PBB. Mesyuarat ini bersetuju bagi Negara-negara Anggota OIC untuk mengenakan tekanan yang berterusan kepada Israel sebagai tanda sokongan kepada Palestin dan memaksa Israel untuk menghentikan pencabulan undang-undang antarabangsa di Palestin serta kekejaman Israel terhadap rakyat Palestin terutamanya di Khan Al-Ahmar. Kehadiran Malaysia ke Mesyuarat ini adalah bagi menyatakan sokongan Malaysia kepada perjuangan rakyat Palestin.

16. Selaku sebuah negara yang berpegang kepada prinsip keadilan sejagat, kedaulatan undang-undang serta akauntabiliti, Malaysia menyokong sepenuhnya sebarang langkah untuk membawa penjenayah-penjenayah yang telah menyalahi prinsip-prinsip keadilan antarabangsa ke muka pengadilan. Malangnya, Malaysia tidak dapat melakukan apa-apa yang lebih dari itu kerana Malaysia bukan negara pihak kepada Mahkamah Jenayah Antarabangsa (*International Criminal Court – ICC*).

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : JAWAB LISAN
DARIPADA : TUAN TAN KOK WAI [CHERAS]
TARIKH : 4 DISEMBER 2018 (SELASA)

SOALAN NO.3

Tuan Tan Kok Wai [Cheras] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian melaksanakan “bank makanan” di kawasan-kawasan yang mencatat angka kemiskinan yang tinggi.

JAWAPAN

Tuan Yang di-Pertua,

JKM tidak melaksanakan bank makanan (*food bank*) di kawasan yang mencatatkan angka kemiskinan yang tinggi disebabkan:

- (i) Memberi fokus kepada perkhidmatan teras iaitu penyediaan bantuan kewangan kebajikan secara bulanan atau sekali gus serta program-program memperkasakan ekonomi penerima bantuan; dan
- (ii) Berdasarkan kajian keberkesanan bantuan JKM pada tahun 2017 yang dijalankan oleh UPM mendapati pemberian wang adalah lebih efektif bagi memenuhi keperluan asas untuk kelangsungan hidup penerima bantuan.

Tuan Yang di-Pertua,

Namun begitu, Kementerian melalui Yayasan Kebajikan Negara (YKN) ada menyediakan bantuan *food bank*. Kementerian ini melalui projek Anjung Singgah dan Pusat Transit Gelandangan Kuala Lumpur yang ditadbir oleh YKN telah mengadakan kerjasama strategik bersama beberapa Pertubuhan Bukan Kerajaan (NGO) seperti Kechara Soup Kitchen dan Food Aid Foundation yang merupakan pengendali bank makanan. NGO yang lain adalah termasuk:

- (i) Pertubuhan Kulinari Amal Selangor @ Merci Cullinary
- (ii) Charity Rights Mercy Mission
- (iii) Food 4 u
- (iv) The Gagaks
- (v) Hindu Sevai Sangam & Sewa Ashram Foundation
- (vi) Misi Sedekah Jumaat
- (vii) Street Sherperd Outreach
- (viii) Street Feeders Kuala Lumpur
- (ix) Dapur Jalanan Ipoh
- (x) Nasi Lemak Project
- (xi) Rymau Familia
- (xii) Usrah Biru
- (xiii) Pertubuhan Wellness

- (xiv) We Love Charity
- (xv) Ikram Belia
- (xvi) Persatuan Kebajikan Harapan Kuching
- (xvii) Yayasan Kemajuan Insan Sarawak
- (xviii) Yayasan Salam Sarawak
- (xix) Yayasan Salam Kuala Lumpur
- (xx) The Kidness Pulau Pinang
- (xxi) Mutiara Prihatin Pulau Pinang
- (xxii) Little Helpest

Tuan Yang di-Pertua,

Selain daripada penglibatan NGO yang mempunyai bank makanan, pihak Kementerian Wilayah Persekutuan (KWP) melalui Dewan Bandaraya Kuala Lumpur juga telah memilih Anjung Singgah Kuala Lumpur, Pusat Transit Gelandangan Kuala Lumpur dan Pusat Khidmat Gelandangan Medan Tuanku sebagai pusat agihan makanan sumbangan daripada pelbagai pihak. Dengan membuat agihan makanan di Pusat-pusat Khidmat di atas, agihan makanan dapat disalurkan dengan baik, teratur dan sistematik.

Untuk makluman Yang Berhormat, Kementerian ini telah mengambil inisiatif menubuhkan Anjung Singgah yang ditadbir oleh YKN bertujuan membantu golongan gelandangan dan memberikan perkhidmatan yang meliputi tempat penginapan sementara, makan minum, program intervensi kaunseling dan motivasi, pusat rujukan bantuan sosial serta bantuan mendapatkan pekerjaan melalui kerjasama agensi-agensi kerajaan serta Pertubuhan bukan kerajaan (NGO) yang berkaitan. Sehingga kini sebanyak lima (5) buah Anjung Singgah telah beroperasi iaitu:

- (i) Anjung Singgah YKN Kuala Lumpur – mula beroperasi mulai 9 April 2011;
- (ii) Anjung Singgah YKN Sarawak - 15 Oktober 2012;
- (iii) Anjung Singgah YKN Johor - 9 Jun 2013;
- (iv) Anjung Singgah YKN Pulau Pinang – 9 Jun 2014; dan
- (v) Anjung Singgah Perak – 9 Januari 2017

SOALAN NO.3

Dengan kapasiti 288 buah katil di Anjung Singgah dan 150 buah katil di Pusat Transit Gelandangan Kuala Lumpur dari sejak ianya ditubuhkan pada tahun 2011 dan diperluaskan di seluruh negara. Sehingga Ogos 2018 seramai 6,102 orang gelandangan telah mendaftar masuk dan menerima perkhidmatan di Anjung Singgah secara sukarela dan seramai 2,082 orang gelandangan telah mendaftar sebagai penghuni di PTGKL bermula pada 10 Februari 2016 sehingga 5 November 2018.

Antara faedah yang diperoleh daripada penubuhan Anjung Singgah ini ialah:

- i. Memudahkan golongan gelandangan dikesan dan dihubungi, serta profil mengenai mereka dapat dikumpulkan bagi tujuan peranan program pembangunan sosial pada masa hadapan;
- ii. Memudahkan bantuan dan perkhidmatan kepada golongan gelandangan disalurkan dan diselaraskan di pusat-pusat ini di Kuala Lumpur. Pengalaman pekerja-pekerja di YKN adalah apabila terlalu banyak NGO melakukan *food bank* di kawasan Kuala Lumpur, saya difahamkan sebagai contoh semasa di bulan Ramadhan seorang golongan gelandangan boleh mendapat sehingga 18 *pack* makanan kerana tiada kordinasi, Selain itu, ada juga yang mengumpul roti Gardenia sampai boleh jadi bantal kerana terlalu banyak yang membantu;
- iii. Meningkatkan lagi kesedaran dan penyertaan masyarakat dalam memainkan peranan untuk menyelesaikan isu dan masalah masyarakat; dan
- iv. Membolehkan jalin kerjasama antara agensi secara berpusat melalui jawatankuasa khas ini.

Yang pentingnya adalah julat umur penghuni yang mendapat khidmat di Anjung Singgah dan PTGKL adalah lingkungan berumur 31 tahun hingga 50 tahun. Ini bermaksud mereka ini kebanyakannya terdiri daripada golongan yang tiada kemampuan untuk menyewa rumah atau

SOALAN NO.3

bilik setelah mendapat pekerjaan, pihak majikan tidak dapat menyediakan asrama penginapan dan golongan yang sentiasa memerlukan sistem sokongan. Selain itu, golongan ini juga menghadapi kekangan untuk mengubah kehidupan dan sukar mendapat penempatan pekerjaan atas faktor ketagihan dadah, alkohol, masalah kesihatan dan sikap gelandangan itu sendiri yang masih tidak mahu berubah.

Jadi usaha sama Kementerian ini bersama Kementerian Wilayah Persekutuan (KWP) dalam menubuhkan Pusat Transit Gelandangan dan baru-baru ini juga, Kementerian Perdagangan Dalam Negeri dan Hal Ehwal Pengguna (KPDNHEP) telah pun mengumumkan bahawa mereka akan melaksanakan program Food Bank Malaysia yang akan mengumpulkan makanan berlebihan dari pasaraya untuk diagihkan kepada mereka yang memerlukan. Ini merupakan satu inisiatif peduli rakyat bagi meringankan beban yang terpaksa ditanggung kesan kenaikan kos sara hidup dan mengurangkan pembaziran makanan di Malaysia. Golongan sasaran bagi program ini adalah penerima yang terdiri daripada isi rumah berpendapatan kurang RM930.00 sebulan dan berdasarkan maklumat eKasih, seramai 186,354 ketua isi rumah yang berada dalam paras garis kemiskinan. Di samping itu, program ini juga akan menyalurkan bantuan kepada rumah kebajikan yang berdaftar dengan JKM yang menempatkan anak yatim dan warga emas.

Program ini akan dilaksanakan di seluruh negara pada awal tahun 2019 dengan kerjasama pasar raya - pasar raya utama di seluruh negara. Jadi kalau ada soalan tambahan ini kita kena salurkan kepada KPDNHEP kerana program ini adalah bersama mereka.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN
DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]
TARIKH : 4 DISEMBER 2018 (SELASA)

SOALAN NO.4

Datuk Hajah Azizah Binti Datuk Seri Panglima Haji Mohd Dun [Beaufort] minta MENTERI PEMBANGUNAN WANITA, KELUARGA DAN MASYARAKAT menyatakan:

- a) Bilangan suri rumah yang disasarkan akan menerima caruman KWSP melalui program I-SURI menjelang tahun 2020; dan
- b) Setakat ini berapakah bilangan suami yang telah memberikan caruman KWSP secara sukarela kepada isteri mereka yang merupakan suri rumah.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : LISAN
DARIPADA : PUAN JUNE LEOW HSIAD HUI
[HULU SELANGOR]
TARIKH : 4 DISEMBER 2018 (SELASA)

SOALAN NO. 30

Puan June Leow Hsiad Hui [Hulu Selangor] minta **MENTERI PEMBANGUNAN WANITA, KELUARGA DAN MASYARAKAT** menyatakan berapa jumlah Caruman Sukarela Insentif Suri (i-Suri) berdasarkan kategori hingga setakat ini.

JAWAPAN

Tuan Yang di-Pertua,

Saya mohon izin untuk menjawab soalan daripada YB Beaufort bersekali dengan pertanyaan YB Hulu Selangor pada 4 Disember 2018 kerana pertanyaan-pertanyaan tersebut saling berkait.

Tuan Yang di-Pertua,

Skim Caruman Sukarela Insentif Suri atau i-Suri adalah program usaha sama Kerajaan yang melibatkan Kementerian Pembangunan Wanita, Keluarga dan Masyarakat (KPWKM), Unit Penyelarasan Pelaksanaan, Jabatan Perdana Menteri (ICU JPM) dan Kementerian Kewangan, melalui agensi di bawahnya iaitu Kumpulan Wang Simpanan Pekerja (KWSP).

Fasa 1 i-Suri yang telah dilancarkan pada 8 Ogos 2018 mula berkuat kuasa dan dibuka untuk pendaftaran pada 15 Ogos 2018. Pelaksanaan i-Suri dijalankan secara berfasa iaitu :

- (i) **Fasa pertama: Caruman secara sukarela;**
- (ii) **Fasa Kedua: Caruman secara sukarela dengan perluasan liputan perlindungan sosial (iaitu PERKESO); dan**
- (iii) **Fasa Ketiga: Caruman wajib.**

Kita masih sekarang dalam Fasa Pertama sahaja. Menurut statistik pendaftaran ahli bagi i-Suri yang disenggarakan oleh KWSP, dalam masa lebih kurang tiga (3) bulan i-Suri diperkenalkan iaitu bermula **15 Ogos 2018 sehingga 3 Disember 2018**, terdapat seramai **40,923 ahli** telah berdaftar.

Fasa 1 dan Fasa 2 i-Suri dijalankan secara caruman sukarela dan pendekatan adalah secara bersasar (*targeted*) iaitu wanita yang berdaftar dalam Pangkalan Data Kemiskinan Nasional (eKasih) kendalian ICU JPM sehingga 30 Jun 2018 serta memenuhi kriteria kelayakan yang ditetapkan. Ini termasuk suri rumah yang merupakan isteri kepada Ketua Isi Rumah (KIR), KIR wanita dalam kalangan ibu tunggal, balu dan wanita belum

SOALAN NO.4

berkahwin (bujang). Pelaksanaan Fasa 1 dan 2 tidak melibatkan caruman daripada suami tetapi ahli sendiri. Jangkaan tempoh masa pelaksanaan Fasa 1 dan Fasa 2 ialah selama dua (2) tahun, iaitu pada tahun 2018 dan 2019.

Seterusnya, dijangkakan pada tahun 2020, pelaksanaan i-Suri Fasa 3 iaitu caruman secara wajib akan diperkenalkan. Berbeza dengan Fasa 1 dan Fasa 2, Fasa 3 i-Suri dan fasa-fasa seterusnya lebih bersifat menyeluruh, di mana sasaran adalah untuk membina asas keselamatan sosial terhadap 45.4 peratus wanita yang berada di luar pasaran buruh. Namun begitu tempoh masa pelaksanaan caruman wajib ini adalah tertakluk kepada dapatan dan hasil semakan terhadap kekangan perundangan yang dihadapi daripada segi Akta, Dasar dan Peraturan sedia ada. Setelah kekangan perundangan diselesaikan, mekanisme yang bersesuaian akan dikenal pasti bagi membolehkan Fasa 3 dan fasa seterusnya dijalankan.

Kementerian juga amat teruja kerana i-Suri turut menjadi pemangkin dan telah berjaya membuka kesedaran kepada golongan wanita yang bekerja sendiri dan tiada pendapatan tetap. Ini termasuklah suri rumah yang bukan terdiri daripada kumpulan sasaran Fasa 1 i-Suri yang kini telah mula menyimpan di dalam akaun KWSP sebagai persediaan pelan persaraan mereka melalui satu lagi inisiatif yang telah diperkenalkan KWSP iaitu i-Saraan. Konsep i-Saraan adalah bagi menggalakkan caruman secara sukarela ke dalam akaun KWSP mengikut kemampuan. Simpanan ini turut akan menerima sumbangan padanan daripada Kerajaan sebanyak 15 peratus dari amaun caruman tertakluk kepada jumlah maksimum sebanyak RM250 setahun. Bilangan pendaftaran i-Saraan (Suri Rumah) adalah sebanyak 22,949 (bermula 15 Ogos 2018 sehingga 3 Disember 2018).

Jadi bagi golongan wanita sekarang apabila mereka pergi ke KWSP untuk semak sama ada mereka layak Program i-Suri atau tidak, sekiranya nama mereka tiada di dalam i-Suri, KWSP akan perkenalkan Program i-Saraan kepada mereka. Dan kita boleh lihat daripada statistik yang telah saya perolehi, sebelum 15 Ogos 2018 (sebelum i-Suri diperkenalkan), Program i-Saraan hanya mempunyai 26,393 pendaftaran. Tetapi selepas i-Suri

SOALAN NO.4

diperkenalkan, i-Saraan telah meningkat pendaftaran 86.9 peratus daripada jumlah 26 ribu sekarang telah mencecah 49,342. Bermaksud kesedaran dalam kalangan wanita sekarang untuk menjimatkan duit mereka telah wujud kerana ada Program i-Suri dan yang tidak layak sekarang mereka boleh dapatkan Program i-Saraan.

Sebagai rumusannya, melalui pelaksanaan i-Suri, hasrat Kerajaan untuk menyediakan satu bentuk jaringan keselamatan sosial yang asas melalui inisiatif khusus untuk kaum wanita telah dapat diwujudkan. Ia bertujuan memperkasa hak wanita dan melindungi suri rumah dan ahli keluarga yang lain bahkan turut dapat diperluaskan kepada golongan yang bekerja sendiri dan tiada pendapatan tetap termasuklah suri rumah yang bukan terdiri dari kumpulan rentan (*vulnerable*).

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB PUAN NOR AZRINA BINTI SURIP

TARIKH : 04 DISEMBER 2018

SOALAN :

Puan Nor Azrina binti Surip [Merbok] minta **MENTERI TENAGA MANUSIA** menyatakan sama ada Pertubuhan Keselamatan Sosial (PERKESO) boleh mempertimbangkan untuk membuka Sistem Insurans Pekerjaan (SIP) kepada penyertaan sukarela kepada orang-orang yang bekerja sendiri (selain pemandu teksi) sebagai mencontohi Ireland.

PR-1412-L02716

JAWAPAN

Tuan Yang Di Pertua,

1. Kementerian ini melalui Pertubuhan Keselamatan Sosial (PERKESO) sentiasa berusaha memberikan perlindungan keselamatan sosial kepada semua lapisan pekerjaan sama ada di sektor formal mahupun sektor tidak formal. Kebanyakan negara melaksanakan Sistem Insurans Pekerjaan (SIP) secara konservatif pekerjaan yang bergaji tetap di sektor swasta. Walau bagaimanapun, terdapat negara-negara yang telah meluaskan liputan kepada individu yang bekerja sendiri termasuk kategori pekerjaan tertentu secara sukarela (*voluntary basis with certain conditions*) seperti di negara Denmark dan Jerman.

2. Di bawah Konvensyen Pertubuhan Buruh Antarabangsa ILO C.168 dan C.102, liputan ini tidak meliputi individu yang bekerja sendiri adalah disebabkan kesukaran menjalankan pengurusan serta memeriksa keadaan pekerjaan mereka. Dikebanyakan negara ini juga, menghadapi kesukaran meliputi pekerja-pekerja di sektor tidak formal, sebilangan besar daripada mereka bekerja sendiri yang lain boleh digunakan dalam aktiviti yang tidak berdaftar.

3. Kementerian Sumber Manusia melalui PERKESO mengambil inisiatif memperkenalkan jaringan keselamatan sosial kepada individu yang bekerja sendiri melalui Akta Keselamatan Sosial Pekerjaan Sendiri 2017 yang memberikan perlindungan kemalangan sewaktu

bekerja. PERKESO berpegang kepada konsep solidariti iaitu “*pooling of resources, sharing of risks*” dan prihatin. PERKESO perlu mengkaji implikasi perluasan liputan dan pelaksanaannya daripada segi kebolehidupan skim tersebut dan *nature* mereka terhadap komponen-komponen SIP secara menyeluruh.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 4 DISEMBER 2018 (KHAMIS)

SOALAN NO. 6

Tuan Ahmad Fadhli bin Shaari minta **MENTERI BELIA DAN SUKAN** menyatakan rasional Kerajaan ingin menurunkan had umur pengundi kepada 18 tahun.

JAWAPAN

Yang di-Pertua,

1. Antara rasional Kerajaan ingin menurunkan had umur pengundi kepada 18 tahun ialah:
 - i. Menjadikan belia sebagai rakan strategik dan terlibat dalam membentuk acuan masa depan Negara;
 - ii. Berdasarkan statistik penduduk negara, seramai 1.56 juta adalah dikalangan belia diperingkat umur 18 sehingga 20 tahun yang mewakili 10% dari jumlah keseluruhan pengundi yang sedia berdaftar. Adalah tidak adil untuk meniadakan hak mereka untuk membuat keputusan untuk memilih kerajaan secara formal.
 - iii. Memastikan had umur mengundi setara piawaian antarabangsa. Sebagai contoh, majoriti negara di Eropah, Amerika Selatan, Negara-negara Arab dan majoriti negara-Negara anggota ASEAN telah menetapkan had mengundi pada umur 16 dan 18 tahun sejak tahun 1970an lagi;
 - iv. Meningkatkan penyertaan belia sebagai warga bertanggungjawab dalam menyumbang kepada pembangunan negara dengan menggalakkan penglibatan belia dalam proses demokrasi negara; dan
 - iv. Memantapkan proses pembangunan belia dan menjadikan belia sebagai golongan pelapis masa depan negara. Proses membangunkan belia memerlukan satu perancangan strategik yang bersifat jangka masa panjang atau jangka masa pendek.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN KHOO POAY TIONG [KOTA MELAKA]

TARIKH : 4 DISEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan berapakah peruntukan (mengikut pecahan negeri) yang telah disalurkan kepada negeri-negeri untuk tujuan industri pelancongan dan apakah kaedah, kriteria dan proses yang digunakan untuk menentukan peruntukan ini.

JAWAPAN :

Tuan Yang di-Pertua,

Kementerian Pelancongan, Seni dan Budaya Malaysia telah memperuntukkan sejumlah peruntukan dalam pelbagai program untuk peningkatan pelancongan seperti Program Penyediaan / Peningkatan Kemudahan Pelancongan; Program Eko-Pelancongan; Program Naiktaraf / Penyelenggaraan; dan Program Kemudahan Inap Desa (Homestay). Peruntukan pembangunan pelancongan di negeri-negeri bagi tahun 2017 dan 2018 adalah seperti berikut:-

Bil	Negeri	Peruntukan Pembangunan (RM)	
		2017	2018
1.	Sabah	8,573,050.00	6,519,000.00
2.	Sarawak	8,023,300.00	3,923,900.00
3.	Perak	520,300.00	2,110,000.00
4.	Selangor	1,467,000.00	1,920,000.00
5.	Negeri Sembilan	6,664,400.00	1,580,100.00
6.	Pulau Pinang	666,200.00	1,510,530.00
7.	Terengganu	390,750.00	1,100,000.00
8.	Kedah	8,703,000.00	1,000,000.00
9.	Perlis	-	92,007.00
10.	Kelantan	805,600.00	56,940.00
11.	Pahang	930,800.00	-
12.	WP Labuan	600,000.00	-
13.	Johor	-	-
14.	Melaka	170,900.00	-
15.	WP Kuala Lumpur	-	-
	JUMLAH KESELURUHAN	37,515,300.00	18,301,947.00

SOALAN NO : 7

Kaedah pengagihan peruntukan pembangunan ke negeri-negeri ditentukan berdasarkan kepada kebolehlaksanaan projek-projek yang dicadangkannya mengikut keutamaan. Permohonan juga di nilai dari segi komitmen agensi pemohon dalam mengoperasi dan menyelenggara projek-projek sedia ada. Cadangan projek yang telah disenarai pendek seterusnya akan dibentangkan kepada EPU,MEA untuk pertimbangan dan kelulusan.

Kementerian juga melaksanakan program-program pelancongan, seni dan budaya di seluruh negara menerusi pelaksanaan oleh Pejabat Kementerian Pelancongan, Seni dan Budaya. Kementerian melaksanakan program-program pelancongan seperti Visit My Kampung, Program Galakan MyTQA, sesi *engagement* bersama penggiat industri mengenai tabung pelancongan, MOTAC *Voluntourism* dan latihan kepada penggiat industri dengan penyaluran kewangan kepada pejabat-pejabat negeri MOTAC. Sehingga September 2018, sejumlah RM 1,704,547.20 telah disalurkan kepada 15 Pejabat MOTAC Negeri dengan jumlah peruntukan yang telah disalurkan mengikut negeri seperti berikut:

No	Pejabat MOTAC Negeri	Peruntukan Program (RM)
1	Sarawak	241,600.00
2	Perlis	180,000.00
3	Pahang	159,500.00
4	WP Kuala Lumpur / Putrajaya	155,742.20
5	Perak	124,825.00
6	Sabah	124,305.00
7	Johor	123,700.00
8	Selangor	118,500.00
9	Melaka	92,000.00
10	Pulau Pinang	92,000.00
11	Terengganu	92,000.00
12	Kelantan	62,775.00

SOALAN NO : 7

13	Kedah	59,950.00
14	Negeri Sembilan	57,650.00
15	WP Labuan	20,000.00
Jumlah Keseluruhan		1,704,547.20

Kriteria yang digunakan adalah dengan mengambil kira kapasiti pembangunan latihan industri di semua negeri, bilangan homestay yang berdaftar dengan Kementerian dan pembahagian mengikut zon bagi program *engagement* bersama penggiat industri untuk hebahan MyTQA dan tabung pelancongan. Selain daripada peruntukan tersebut, pelbagai program juga dilaksanakan oleh agensi-agensi Kementerian untuk program-program seni dan budaya di seluruh negara.

Kementerian juga menyelaraskan dua (2) kemudahan Tabung Pelancongan berbentuk pinjaman iaitu Tabung Pembangunan Infrastruktur Pelancongan (TPIP) dan Tabung Khas Pelancongan (TKP). Kedua-dua tabung tersebut bertujuan untuk membantu para pengusaha yang ingin membangunkan atau mengembangkan produk-produk pelancongan seperti premis penginapan pelancongan, kemudahan-kemudahan dan lain-lain projek pelancongan di seluruh negeri. Pada tahun 2018, sebanyak 19 permohonan telah disokong dengan jumlah RM800,802,048.94 yang melibatkan 10 permohonan TPIP sejumlah RM673,003,744.00 dan 9 permohonan TKP sejumlah RM127,798,304.94. Sokongan ini melibatkan 9 negeri iaitu Johor, Kedah, Melaka, Pahang, Perlis, Pulau Pinang, Sarawak, Terengganu, dan Wilayah Persekutuan Kuala Lumpur.

Sekian, terima kasih.

SOALAN NO : 8

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB DATO' SERI TIONG KING SING

KAWASAN : BINTULU

TARIKH : 04 DISEMBER 2018, SELASA

SOALAN :

YB DATO' SERI TIONG KING SING minta **MENTERI KERJA RAYA** menyatakan:

(a) adakah pihak Kementerian melaksanakan penyelenggaraan jalan raya lama yang sedia ada ketika melaksanakan projek Lebuhraya Pan Borneo; dan

(b) jika ya, berapakah peruntukan telah disediakan untuk penyelenggaraan jalan raya lama tersebut dan apakah piawaian keselamatan yang digunakan oleh pihak Kementerian untuk penyelenggaraan jalan raya lama tersebut.

JAWAPAN :

Tuan Yang Di-Pertua,

Untuk makluman Ahli Yang Berhormat, Kementerian Kerja Raya tidak menjalankan program penyenggaraan Jalan Persekutuan bagi projek Lebuhraya Pan Borneo memandangkan skop penyenggaraan rutin telah dikira sebagai sebahagian daripada skop pembinaan dan Tempoh Tanggungan Kecacatan (*Defect Liability Period* – DLP). Walau bagaimanapun prosedur-prosedur keselamatan seperti berikut tetap digunapakai semasa tempoh berkenaan:

1. Prosedur Pelan Pengurusan Trafik di tapak bina sepanjang pembinaan jalan raya, berpandukan kepada Piawaian Arahan Teknik JKR;
2. Akta Kilang Dan Jentera 1967, Peraturan (BOWEC – Building Operation and Works of Engineering Construction) 1986;
3. Akta Keselamatan dan Kesihatan Pekerjaan 1994; dan
4. Garis Panduan Keselamatan dan Kesihatan Pekerjaan Awam di Tapak Bina Tahun 2007.

Bagi jalan Persekutuan bukan di bawah skop pembinaan projek Lebuhraya Pan Borneo, penyenggaraan Jalan Persekutuan adalah di bawah Kementerian, yang dilaksanakan oleh konsesi penyenggaraan yang dilantik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 4 DISEMBER 2018 (SELASA)

SOALAN NO. 9

minta **MENTERI PENDIDIKAN** menyatakan :-

- (a) apakah rancangan Kementerian bagi menangani isu laluan kerjaya Anggota Kumpulan Pelaksana berijazah Jabatan Pendidikan Negeri Sabah ; dan
- (b) adakah Kementerian akan mengkaji semula laluan kerjaya Anggota Kumpulan Pelaksana kepada Pegawai Kumpulan Pelaksana yang mempunyai ijazah atau ke atas seperti jabatan yang lain.

JAWAPAN

Yang di-Pertua,

- (a) Untuk makluman Ahli Yang Berhormat, setiap skim perkhidmatan dalam Perkhidmatan Awam mempunyai laluan kerjaya dan syarat kelayakan masuk yang pelbagai dan berbeza antara satu sama lain. Ini adalah selari dengan bentuk tugas dan kemahiran yang diperlukan bagi melaksana peranan skim perkhidmatan tersebut. Kementerian juga sedia maklum akan adanya anggota kumpulan pelaksana di kementerian termasuk di Jabatan Pendidikan Negeri Sabah yang telah melanjutkan pengajian ke peringkat ijazah sarjana muda dan peringkat ijazah sarjana semasa dalam perkhidmatan. Bagi anggota kumpulan pelaksana yang telah memiliki tahap akademik yang lebih tinggi, kementerian amat menggalakkan anggota untuk memohon jawatan yang bersesuaian dengan tahap dan bidang pengajian menerusi Pihak-pihak Berkuasa Melantik (cth: Suruhanjaya Perkhidmatan Awam) yang berkaitan.
- (b) Skim-skim perkhidmatan bagi anggota kumpulan pelaksana di kementerian ini seperti Pembantu Tadbir (Pengkeranian/Operasi), Pembantu Tadbir (Kewangan), Pembantu Makmal, Pembantu Pengurusan Murid dan lain-lain tidak diperuntukkan skim perkhidmatan bersepadu yang membolehkan pegawai dinaikkan gred setelah memiliki kelayakan akademik yang lebih tinggi. Cadangan pewujudan skim perkhidmatan bersepadu atau skim perkhidmatan Pegawai Kumpulan Pelaksana sepertimana yang dicadangkan memerlukan kajian yang mendalam dan komprehensif bagi anggota perkhidmatan pelaksana dalam perkhidmatan awam secara keseluruhan oleh agensi pusat.

Sekian, terima kasih

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA

PERTANYAAN : LISAN
DARIPADA : DATUK ALEXANDER NANTA LINGGI
KAWASAN : KAPIT
TARIKH : 4 DISEMBER 2018

SOALAN

TUAN WONG CHEN [Subang] minta **MENTERI PERDAGANGAN ANTARABANGSA DAN INDUSTRI** menyatakan apa sebenarnya yang dikatakan kejayaan yang telah dicapai oleh PROTON. Berapa jumlah besar pelaburan kewangan yang telah dibelanjakan dan berapa keuntungan yang terdapat dari PROTON sejak perniagaannya bermula pada tahun 1985.

JAWAPAN

Tuan Yang di-Pertua,

Sejak ditubuhkan pada tahun 1983, PROTON telah banyak menyumbang dan memberi manfaat yang besar kepada pembangunan industri automotif di Malaysia.

PROTON sehingga kini telah melancarkan 26 model kenderaan baharu di samping terlibat di dalam pembangunan serta pemasangan beberapa siri enjin CamPro. Sejak penubuhan, sebanyak 4.3 juta kereta PROTON telah dikeluarkan daripada kilang-kilang PROTON di Shah Alam dan Tanjung Malim. Daripada jumlah ini, 3.9 juta unit kereta PROTON telah dipasarkan di pasaran Malaysia manakala hampir 400 ribu unit adalah merupakan bagi pasaran eksport.

Antara objektif penubuhan PROTON adalah untuk memperoleh dan meningkatkan keupayaan teknologi dan industri melalui perkilangan automotif. PROTON telah berjaya mewujudkan syarikat-syarikat

pengeluar komponen tempatan yang berdaya saing sehingga ke tahap global. Di samping itu, PROTON turut membuka peluang perniagaan kepada wakil niaga dan servis dalam sektor lepasan jualan automotif.

Pada 23 Jun 2017, PROTON juga menandatangani Perjanjian Kerjasama Strategik bersama Geely. Kerjasama strategik ini akan memberi impak yang positif kepada industri automotif negara memandangkan ekosistem PROTON melibatkan 10,000 orang pekerja PROTON dan 50,000 pekerja lain yang terlibat dalam "*supply chain*" PROTON.

Di samping itu, kerjasama ini juga amat penting dalam usaha untuk mencapai transformasi bagi memulihkan prestasi perniagaan PROTON. Menerusi kerjasama strategik tersebut juga, PROTON telah melancarkan kenderaan model SUV baharu iaitu X70 yang mana ianya dibangunkan bersama Geely.

Tuan Yang di-Pertua,

Bagi menjawab persoalan jumlah pelaburan kewangan serta keuntungan PROTON sejak tahun 1985 hingga sekarang, segala maklumat tersebut boleh dirujuk di dalam Laporan Tahunan syarikat yang tidak dikawal selia oleh pihak Kerajaan.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU] PH-PKR**

TARIKH : 4 DISEMBER 2018 (SELASA)

SOALAN : 11

PR-1411-L01947

Tuan Jugah anak Muyang @ Tambat [Lubok Antu] minta MENTERI KOMUNIKASI DAN MULTIMEDIA menyatakan cadangan untuk menambahkan waktu siaran bahasa Iban daripada 15 minit kepada 30 minit waktu siaran.

JAWAPAN:

Tuan Yang di-Pertua,

1. Untuk makluman Ahli yang Berhormat, siaran radio dalam bahasa Iban bermula pada 7 jun 1954, iaitu sejak Jabatan Penyiaran Sarawak ditubuhkan, yang mana siaran pada waktu itu hanyalah 30 minit.
2. Pada April 1963, siaran bahasa iban ditambah menjadi 3 jam sehari. Pada 1 april 2004, siaran radio dalam bahasa iban diberi nama baharu, iaitu WAlfm dan kualiti siarannya dinaik taraf kepada fm, *frequency modulation*.
3. Pada masa ini, Kementerian melalui saluran TV Okey RTM telah pun menyiarkan berita dalam Bahasa Iban selama 30 minit setiap hari, iaitu, 15 minit pada jam 11.45 pagi dan 15 minit pada jam 6.30 petang.
4. Selain daripada itu, siaran dalam Bahasa Iban melalui saluran radio WAlfm Iban juga telah bersiaran selama 18 jam setiap hari mulai tahun 2010. Kandungan siarannya meliputi penyampaian maklumat kerajaan, pembangunan masyarakat setempat, rancangan keagamaan, berita, dan hiburan yang memenuhi kehendak pendengar.
5. Tambahan masa siaran radio secara berperingkat-peringkat dan usaha menaiktaraf kualiti siaran membuktikan komitmen kerajaan dalam siaran radio dan tv dalam Bahasa Iban dan lain-lain Bahasa etnik di Sabah dan Sarawak.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB DATUK HALIMAH BINTI MOHAMED
SADIQUE

TARIKH : 04 DISEMBER 2018

SOALAN :

Datuk Halimah binti Mohamed Sadique [Kota Tinggi] minta **MENTERI TENAGA MANUSIA** menyatakan apakah kekangan yang dihadapi dalam melaksanakan perintah kadar gaji minimum baharu bagi sektor swasta yang telah dikenal pasti dan apakah tindakan bagi memastikan usaha ini tidak membebankan majikan dalam situasi ekonomi ketika ini.

PR-1412-L01547

JAWAPAN

Tuan Yang Di Pertua,

1. Antara cabaran yang dihadapi dalam melaksanakan gaji minimum pada kali ini adalah seperti berikut:

- (i) Memenuhi Janji Kerajaan untuk mencapai gaji minimum RM1,500 dalam tempoh 5 tahun pemerintahan;
- (ii) Menyeimbangkan antara keperluan sara hidup pekerja, kewangan majikan untuk membayar gaji serta memastikan ekonomi negara terus berkembang positif;
- (iii) Mencapai objektif gaji minimum, antaranya menggalakkan industri meningkatkan rangkaian pengeluaran dengan melabur dalam teknologi tinggi serta mengurangkan kebergantungan kepada pekerja asing; dan
- (iv) Memastikan pematuhan Perintah Gaji Minimum, terutama di kalangan majikan IKS.

Tuan Yang Dipertua,

2. Dalam memastikan usaha pembayaran gaji minimum ini tidak membebankan majikan dalam situasi ekonomi ketika ini dan

pelaksanaan dasar ini berjalan lancar pada masa depan, usaha Kerajaan adalah seperti berikut:-

- i) Kerajaan akan memastikan supaya satu *road map* disediakan berkenaan kenaikan gaji minimum kepada RM1,500 dalam tempoh lima tahun sebagai langkah untuk memastikan perancangan teliti perlu dibuat sebelum kadar baru diputuskan oleh Kerajaan. Langkah juga dapat memberi ruang kepada majikan untuk membuat persediaan sewajarnya sekali gus membantu pihak majikan membuat perancangan kewangan sewajarnya;
- ii) Di samping itu juga, Majlis Perundingan Gaji Negara (MPGN) melalui Akta MPGN 2011 (Akta 732) akan menjalankan sekurang-kurangnya dua lagi Kajian Semula Perintah Gaji Minimum danewartakan sekurang-kurangnya dua Perintah Gaji Minimum dalam tempoh lima tahun pemerintahan. Kajian ini penting untuk melihat implikasi dan hala tuju dasar ini. Melalui kajian ini juga ia turut membantu MPGN membuat syor yang dirasakan wajar dan munasabah sebelum dipertimbangkan oleh Kerajaan. Berdasarkan input dari kajian ini juga akan dijadikan asas kepada Kerajaan untuk membuat keputusan supaya semua pihak dapat menikmati hasil pelaksanaan dasar ini sama ada dari aspek

perkembangan ekonomi dan daya saing yang meningkat atau meningkatkan pendapatan para pekerja; dan

- iii) Seterusnya selain daripada kajian 2 tahun sekali, Kerajaan juga berpendirian adalah penting untuk membuat kajian berterusan bagi memastikan dasar ini sentiasa dipantau kerana ia merupakan satu dasar yang memberi kesan yang sangat besar bukan sekadar meningkatkan pendapatan rakyat tetapi kesannya kepada daya saing industri dan ekonomi secara keseluruhan. Sekiranya kajian berterusan tidak dibuat maka agak sukar bagi Kerajaan untuk menambahbaikkan pelaksanaan dasar ini.

3. Kesimpulannya Kerajaan sedar dasar gaji minimum ini merupakan dasar yang sensitif. Oleh itu ia perlu dilihat dari perspektif yang lebih luas bukan sekadar melihat dasar ini sebagai dasar untuk membantu rakyat untuk meningkatkan pendapatan, tetapi perlu seiring dengan perkembangan daya saing negara dan juga ekonomi negara secara keseluruhannya.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 4 DISEMBER 2018 (SELASA)

SOALAN NO. 13

Minta **MENTERI PERUMAHAN DAN KERAJAAN TEMPATAN** menyatakan jumlah **sisa plastik kitar semula tahunan, peratusan kitar semula** serta menjelaskan pendirian Kerajaan berkenaan pengimportan sisa plastik yang meningkat dari negara-negara seperti Australia, New Zealand dan United Kingdom.

JAWAPAN :-

Tuan Yang di-Pertua,

1. Untuk makluman Yang Berhormat, pencapaian Kadar Kitar Semula Kebangsaan pada tahun 2018 adalah sebanyak 24.6%. Kadar ini meningkat sebanyak 3.6% berbanding tahun 2017. Berdasarkan pencapaian 24.6% tersebut, sebanyak 46.48% dengan berat 1,562,731 tan metrik adalah sisa plastik yang boleh dikitar semula. Inisiatif yang dilaksanakan oleh Kerajaan seperti program Pengasingan Sisa Pepejal di Punca bermula September 2016 dan program-program kesedaran 3R (*reduce, reuse, recycle*) yang dilaksanakan secara komprehensif dan berterusan meliputi pelbagai golongan sasaran telah menyumbang kepada peningkatan kadar kitar semula kebangsaan tersebut.
2. Untuk makluman Yang Berhormat, berdasarkan rekod Kementerian Perumahan dan Kerajaan Tempatan (KPKT), **data bagi jumlah sisa plastik yang di kitar semula secara tahunan** adalah seperti berikut:

Bil.	Tahun	Berat (tan metrik)	Peratusan (%)
1	2013	374,693	22.72
2	2014	586,142	28.62
3	2015	999,126	42.16
4	2016	1,094,255	38.19
5	2017	1,562,731	46.48

Data bagi pengumpulan sisa plastik tersebut menyumbang kepada pengiraan Kadar Kitar Semula Kebangsaan pada tahun berikutnya.

3. Untuk makluman Yang Berhormat, dasar mengenai pengimportan sisa plastik ke negara ini adalah amat jelas bagi menangani peningkatan kemasukan sisa plastik dari negara luar. Kerajaan tidak akan sekali-kali menjadikan negara ini sebagai *dumpsite* bagi sisa plastik import. Kerajaan hanya akan membenarkan pengimportan sisa plastik yang bernilai tinggi, *homogeneous* dan bersih seperti sisa plastik industri yang tertakluk di bawah Perintah Duti Kastam 2012 iaitu sisa plastik dengan *H.S. Code 3915* dan sisa plastik dari negara-negara maju seperti Jepun, Australia, New Zealand dan United Kingdom memandangkan negara tersebut mempunyai sistem kawalan yang cekap dalam pengurusan sisa plastik.
4. Pada masa ini, KPKT juga telah memutuskan syarat baru untuk memastikan industri ini dapat dikawal selia dengan baik. Antara **syarat - syarat baharu bagi kelulusan AP Sisa Plastik H.S. Code 3915** yang perlu dipatuhi oleh pengimport bagi mengawal kemasukan sisa plastik import ke Malaysia adalah seperti berikut :
- (i) Mengemukakan **surat kelulusan** memasang dan mengoperasi jentera daripada **Jabatan Keselamatan dan Kesihatan Pekerjaan (JKKP)**;
 - (ii) Pengesahan **kapasiti sebenar mesin pemprosesan** oleh SIRIM atau jurutera bertauliah;
 - (iii) Menyatakan maklumat **lokasi pelupusan sisa** yang dijana dari kilang pengimport;
 - (iv) Mengemukakan **senarai pembeli produk akhir**;
 - (v) Mengemukakan semua **senarai kilang di bawah milik syarikat**;
 - (vi) penetapan **ratio** bagi syarikat pengimport sisa plastik yang menghadkan **70% sumber import**;

- (vii) menghadkan pengimportan hanya kepada **sisu plastik daripada premis perindustrian/ *selected segregated post-consumer waste***;
- (viii) **sekatan** pengimportan sisa plastik dari **negara membangun**;
- (ix) menetapkan **lokasi yang bersesuaian** (*zoning*) pada premis pemprosesan sisa kitar semula;
- (x) Memperkenalkan bayaran **levi** kepada pengimport; dan
- (xi) Memperkenalkan **jaminan bank** (*bank guarantee*) kepada pengimport.

Sekian, terima kasih.

PEMBERITAHUAN PERTANYAAN LISAN DEWAN RAKYAT

MESYUARAT KEDUA, PENGGAL PERTAMA

PARLIMEN KEEMPAT BELAS

PERTANYAAN : LISAN
DARIPADA : YB DATUK SERI HAJI AHMAD BIN HAMZAH
[JASIN, BN – UMNO]
TARIKH : 4 DISEMBER 2018 (SELASA)
SOALAN NO : 14

Minta **PERDANA MENTERI** menyatakan sama ada Kerajaan bercadang untuk memperkenalkan Dasar Induk Negara atau *mother policy*. Jika ya, apakah dasar tersebut dan jika tidak, apakah sebabnya ianya tidak mahu digubal.

JAWAPAN: YB TUAN MOHAMED HANIPA MAIDIN
TIMBALAN MENTERI DI JABATAN PERDANA
MENTERI

Tuan Yang di-Pertua,

1. Dasar Keselamatan Negara (DKN) yang mula digunapakai pada Januari 2017 merupakan dasar induk negara (*mother policy*) kerana ia adalah komprehensif dan merangkumi semua komponen penting bagi kewujudan dan kefungsan Malaysia sebagai sebuah negara.
2. DKN juga merupakan dasar utama yang memayungi dasar-dasar Kerajaan yang lain samada dasar berkaitan keselamatan atau bukan keselamatan. Melalui DKN ini, pelaksanaan strategi-strategi utama akan dapat memastikan nilai-nilai teras negara (*national core values*) dipertahankan seterusnya menjadikan Malaysia bebas dari segala bentuk ancaman, bukan sahaja yang bersifat fizikal, malah juga yang bersifat bukan fizikal yang boleh menjejaskan negara di masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 4 DISEMBER 2018

SOALAN NO. 15

Minta **MENTERI PENDIDIKAN** menyatakan pelan untuk meningkatkan hasil terjemahan Institut Terjemahan & Buku Malaysia (ITBM) dalam pelbagai bahasa serta membangunkan ITBM sebagai institusi utama untuk menjadikan Malaysia sebuah hab terjemahan antarabangsa.

JAWAPAN

Yang di-Pertua,

Sehingga 30 September 2018, sebanyak 2,114 judul buku terjemahan dalam bahasa Melayu dan bahasa asing telah diterbitkan oleh Institut Terjemahan Buku Malaysia (ITBM). Buku tersebut terdiri daripada pelbagai genre seperti pendidikan (sains, matematik, sukan dan kreatif), rujukan perguruan, pengurusan, pengajian tinggi, umum, sastera Melayu dan dunia, agama, falsafah dan ensiklopedia. Pada masa ini, terdapat sebanyak 391 judul buku terjemahan sedang diusahakan penerbitannya.

ITBM berusaha meningkatkan hasil terjemahan dan penerbitan buku terjemahan dalam pelbagai bahasa melalui perancangan seperti berikut;

1. meneruskan usaha penerbitan buku terjemahan sedia ada dalam pelbagai bahasa bergantung pada dana yang diperolehi daripada pelbagai sumber;

2. meningkatkan usaha sama dengan pelbagai pihak seperti Penerbit universiti awam dan universiti swasta serta badan korporat/swasta bagi menerbitkan buku terjemahan untuk kegunaan di dalam dan di luar negara; dan
3. meningkatkan kerjasama penerbitan buku dalam bahasa asing dengan negara-negara yang mempunyai hubungan kerjasama dengan ITBM seperti Singapura, Brunei, Indonesia, Jepun, China, Taiwan, Perancis, Jerman, Korea, Indonesia, Thailand, Rusia, Venezuela, Romania, Iran dan mengenal pasti negara-negara lain sebagai rakan strategik kerjasama.

ITBM juga akan meneruskan penyertaan dalam pesta buku antarabangsa utama dunia bagi memperkenalkan dan memasarkan karya tempatan yang diterjemahkan ke peringkat antarabangsa. Antara pelan yang akan dilaksanakan termasuklah;

1. menjadi agensi peneraju dengan memusatkan penyertaan penerbit-penerbit Malaysia ke pesta buku antarabangsa;
2. menggalakkan kerjaya sebagai ejen hak cipta negara;
3. menyelaraskan pencalonan karya tempatan terpilih untuk anugerah antarabangsa;
4. melaksanakan aktiviti perbukuan dengan rakan kerjasama global; dan
5. meningkatkan usaha sama dengan pihak kedutaan negara luar di Malaysia dalam bidang penterjemahan dan penerbitan.

Melalui usaha ini, ITBM diyakini dapat berfungsi untuk menjadikan Malaysia sebuah hab terjemahan antarabangsa dengan menawarkan khidmat penterjemahan dan penerbitan dalam pelbagai bahasa.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH NANCY SHUKRI
[BATANG SADONG]**

TARIKH : 4 DISEMBER 2018 (SELASA)

SOALAN NO.16

Minta **MENTERI BELIA DAN SUKAN** menyatakan apakah tindakan segera yang diambil oleh Kementerian untuk memastikan setiap sekolah di seluruh negara mempunyai padang sukan bagi menggiatkan aktiviti sukan.

JAWAPAN

Yang di-Pertua,

Kementerian Pendidikan Malaysia (KPM) sentiasa memberi perhatian kepada keseimbangan murid melalui pelaksanaan kurikulum yang berteraskan akademik di samping penekanan kepada pembelajaran berdasarkan kemahiran asas pergerakan dan amalan gaya hidup sihat melalui domain psikomotor, kognitif dan afektif.

Padang sekolah dan gelanggang permainan merupakan antara skop wajib dalam pembinaan sekolah rendah dan sekolah menengah. Dalam brif projek KPM telah menetapkan bahawa semua sekolah baharu yang dibina wajib dilengkapi dengan padang permainan dan gelanggang permainan (badminton/sepak takraw/bola tampar/bola jaring/futsal). Walau bagaimanapun, penyediaan skop ini bergantung kepada keluasan tapak sekolah tersebut. KPM telah menetapkan saiz tapak bagi sekolah rendah dan sekolah menengah ialah 6 – 8 ekar dan 8 – 12 ekar bagi membolehkan penyediaan padang dan gelanggang permainan disediakan.

Bagi sekolah yang tidak mempunyai kemudahan sukan seperti padang permainan, pihak Kementerian sentiasa menggalakkan pihak sekolah mengambil langkah alternatif dengan menggunakan kemudahan sukan secara guna sama dengan sekolah yang berhampiran. Sekolah juga boleh menggunakan kemudahan sukan milik agensi luar melalui rundingan dan kerjasama pihak Persatuan Ibu Bapa dan Guru (PIBG). Langkah tersebut dilaksanakan secara berterusan untuk memastikan setiap murid dapat menjalankan aktiviti sukan.

Sekian, terima kasih

RJM141

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH : 4 DISEMBER 2018 (SELASA)

SOALAN NO . 17

Tuan Larry Soon @ Larry Sng Wei Shien [Julau] minta **MENTERI AIR, TANAH DAN SUMBER ASLI** menyatakan bilangan Orang-Utan liar di Malaysia, dan langkah-langkah yang diambil oleh Kementerian untuk memastikan spesies ini terpelihara.

SOALAN NO . 17

JAWAPAN:

Tuan Yang di- Pertua,

Orang Utan adalah spesies endemik yang hanya boleh dijumpai di Kepulauan Borneo dan Sumatra. Bilangan orang utan liar di Malaysia dianggarkan sekitar 12,278 hingga 13,363 ekor.

Kementerian Air, Tanah dan Sumber Asli dengan kerjasama Kerajaan Negeri Sabah dan Sarawak telah mengambil beberapa langkah untuk memastikan spesies ini terus terpelihara. Diantara langkah-langkah tersebut ialah:

- (i) menguatkuasakan undang-undang menerusi Enakmen Pemeliharaan Hidupan Liar 1997 (Sabah) dan Ordinan Perlindungan Hidupan Liar 1998 (Sarawak) yang memperuntukkan penalti bagi kesalahan membunuh, mengganggu dan memburu hidupan liar yang dilindungi sepenuhnya;
- (ii) menggunakan pendekatan *in-situ* iaitu mewujudkan kawasan hutan terlindung sepenuhnya (*Totally Protected Areas*, TPA) di Sarawak. Pada masa kini, 24% atau lebih daripada 247,000 hektar daripada 1 juta hektar kawasan yang disasarkan untuk diwartakan sebagai kawasan TPA adalah dikhaskan untuk perlindungan spesies orang utan di Sarawak. Di Sabah pula, koridor diwujudkan untuk pergerakan orang utan dari satu kawasan dilindungi ke satu kawasan dilindungi yang lain

terutama bagi kawasan hutan berkelompok (*fragmented forest*) bagi mengelakkan kepupusan setempat;

- (iii) menggunakan pendekatan *ex-situ* iaitu menubuhkan Pusat Pemuliharaan Hidupan Liar di Semenggoh dan Matang di Sarawak dan Pusat Pemuliharaan Orang Utan Sepilok, Sabah bagi menguruskan anak orang utan yatim;
- (iv) menjalankan program kesedaran awam tentang kepentingan perlindungan orang utan di Sabah dan Sarawak menerusi ceramah dan pameran di sekolah, program bersepadu dengan badan bukan kerajaan dan program anak angkat orang utan; dan
- (v) kerjasama dengan sektor swasta dalam aktiviti perlindungan orang utan seperti dengan Malaysian Palm Oil Council (MPOC) di kawasan tanah gambut di Taman Negara Ulu Sebuyau dan Taman Negara Sedilu di Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN YUSUF BIN ABD. WAHAB
[TANJONG MANIS]**

TARIKH : 4 DISEMBER 2018 (SELASA)

SOALAN NO. 18

Minta **MENTERI PENDIDIKAN** menyatakan apakah garis panduan untuk membina sebuah sekolah teknik/vokasional di sesebuah kawasan dan apakah ada perancangan Kerajaan untuk membina sebuah sekolah teknik/vokasional di kawasan Tanjong Manis kerana Kawasan Tanjong Manis akan berkembang menjadi sebuah kawasan pertanian dan perindustrian hab halal pada masa hadapan.

JAWAPAN

Yang di-Pertua,

Kementerian Pendidikan Malaysia (KPM) sentiasa memberi penekanan kepada bidang teknikal, vokasional dan kemahiran di Sekolah Menengah Teknik dan Kolej Vokasional supaya dapat menyediakan modal insan yang berkemahiran tinggi dan mampu bersaing dalam teknologi global serta menuju ke arah ekonomi berpendapatan tinggi.

Untuk makluman Ahli Yang Berhormat, justifikasi penubuhan Kolej Vokasional baharu adalah seperti berikut:

1. Pemilihan kursus yang sesuai dengan penduduk setempat dan berhampiran dengan industri yang berkaitan;

NO. SOALAN: 18

2. memenuhi keperluan industri, peluang pekerjaan dan masyarakat setempat;
3. keluasan tanah sekurang-kurangnya 50 ekar;
4. tapak/tanah yang sesuai, mudah akses, sistem jalan raya mudah dihubungi; dan
5. tidak berdekatan dengan kolej vokasional sedia ada.

Pada masa ini, KPM tiada perancangan untuk membina Kolej Vokasional baharu di negeri Sarawak termasuk di Tanjong Manis. Walau bagaimanapun, KPM mengambil berat akan hal ini dan sentiasa membuat kajian keperluan mengikut kesesuaian kursus, industri dan masyarakat setempat di negeri Sarawak.

KPM telah menyediakan sebuah Sekolah Menengah Teknik dan program kolej vokasional di enam (6) buah Kolej Vokasional serta lima (5) ILKA iaitu GIATMARA di negeri Sarawak. Sehingga kini, kapasiti institusi yang ada adalah mencukupi untuk menerima permohonan murid di negeri Sarawak belajar di bidang teknikal, vokasional dan kemahiran.

Sekian, terima kasih

RJM139

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

TARIKH : 4 DISEMBER 2018

DARIPADA : YB TUAN LIM KIT SIANG
[ISKANDAR PUTERI]

SOALAN : 19

YB TUAN LIM KIT SIANG [ISKANDAR PUTERI] minta **PERDANA MENTERI** menyatakan adakah Kementerian berhasrat untuk membentangkan Laporan Jawatankuasa Pembaikan Sistem dan Undang-Undang Pilihan Raya (ERC) kepada Dewan Rakyat untuk dibahaskan dengan lebih lanjut.

JAWAPAN: YB TUAN MOHAMED HANIPA BIN MAIDIN
TIMBALAN MENTERI
DI JABATAN PERDANA MENTERI

Tuan Yang di-Pertua,

1. Seperti mana Ahli Yang Berhormat sedia maklum, Jawatankuasa Pembaikan Sistem dan Undang-Undang Pilihan Raya atau singkatannya ERC telah ditubuhkan dengan matlamat utama mengkaji sistem dan undang-undang pilihan raya sedia ada dan mengemukakan cadangan-cadangan untuk memperkemaskan pelaksanaannya. Objektif utama kajian ERC adalah bagi memastikan pilihan raya yang dilaksanakan di negara ini adalah pilihan raya yang berwibawa atau *credible*, dengan izin serta mendapat kepercayaan awam. Justeru, ERC diberikan tempoh selama dua (2) tahun bagi mengemukakan suatu laporan yang mengandungi cadangan-cadangan reformasi sistem dan undang-undang pilihan raya.

2. Di samping itu, dalam melaksanakan fungsinya yang berasaskan kepada Terma Rujukan, ERC akan turut bekerjasama dengan pelbagai pihak terutama Suruhanjaya Pilihan Raya Malaysia (SPR). Dalam tempoh dua tahun ini, Jawatankuasa tersebut akan mengkaji dan meneliti cadangan-cadangan pembaikan tentang sistem dan proses pilihan raya termasuk cadangan pindaan undang-undang pilihan raya dan undang-undang yang berkaitan. Buat masa ini, ERC giat menjalankan kajian dan perbincangan dengan pihak-pihak tempatan dan luar negara. Kerangka awal cadangan pembaikan sistem dan undang-undang pilihan raya dijangka dapat disiapkan dalam masa satu tahun.

3. Selepas tamat tempoh dua (2) tahun, satu laporan hasil kajian dan cadangan penambahbaikan akan diserahkan kepada Kerajaan dan pelaksanaan cadangan-cadangan tersebut akan ditentukan oleh Kerajaan.

4. Ahli Yang Berhormat, berkenaan cadangan Ahli Yang Berhormat untuk laporan tersebut dibentangkan di Dewan yang mulia ini, hanya akan diputuskan setelah laporan tersebut diteliti dan diumumkan pelaksanaannya kelak oleh Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 4 DISEMBER 2018 (SELASA)

SOALAN NO.20

Minta **MENTERI PENDIDIKAN** menyatakan bilakah pembinaan semula SMK Sebuyau, satu-satunya sekolah menengah dalam DUN Sebuyau, yang dalam keadaan daif dan sangat diperlukan untuk menempatkan pelajar Sekolah Menengah. Berapakah kos pembinaan dan bila dijangka siap serta boleh digunakan.

JAWAPAN

Yang di-Pertua,

Untuk makluman Ahli Yang Berhormat, projek pembinaan gantian penuh SMK Sebuyau telah diluluskan. Pada masa ini, projek tersebut dalam peringkat reka bentuk dan dijangka proses perolehan akan dilaksanakan sebaik selesai proses reka bentuk. Kos siling projek pembinaan gantian penuh sekolah ini adalah sebanyak RM85 juta. Tempoh pembinaan bagi projek ini adalah selama 30 bulan dan dijangka siap pada tahun 2022.

Sekian, terima kasih.

RJM138

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : TUAN WILLIAM LEONG JEE KEEN
[SELAYANG]
TARIKH : 4 DISEMBER 2018 (SELASA)

Tuan William Leong Jee Keen [Selayang] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sama ada monopoli dalam pembekalan barangan dan perkhidmatan akan dikaji semula dan dimansuhkan serta langkah-langkah untuk menguruskan kos sara hidup yang tinggi.

JAWAPAN:

Tuan Yang di-Pertua,

Kerajaan sedang berusaha menangani permasalahan berkaitan monopoli dalam pembekalan barangan dan perkhidmatan. Dalam hal ini, Kementerian Perdagangan Dalam Negeri dan Hal Ehwal Pengguna (KPDNHEP) melalui agensi Suruhanjaya Persaingan Malaysia (MyCC) dengan Akta Persaingan 2010 (Akta 712) akan mengambil tindakan tegas terhadap sebarang perusahaan monopoli atau dominan yang menyalahgunakan kuasa monopoli atau dominan mereka dalam pembekalan barangan dan perkhidmatan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN WONG KAH WOH
[IPOH TIMUR]
TARIKH : 4 DISEMBER 2018 (SELASA)

SOALAN NO. 22

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan sama ada Kementerian bersedia untuk mengarahkan pemegang lesen bekalan elektrik (iaitu Tenaga Nasional Berhad) supaya menurunkan kadar caj bekalan elektrik penggunaan oleh sekolah-sekolah kepada satu kadar yang bersamaan dengan kadar caj untuk premis-premis perkhidmatan Kerajaan.

JAWAPAN

Tuan Yang di-Pertua,

Untuk makluman Ahli Yang Berhormat,

1. Dalam jadual tarif yang berkuat kuasa pada masa ini, sekolah dan premis Kerajaan diletakkan di bawah kategori yang sama iaitu kategori perdagangan. Tarif Perdagangan ini pula terbahagi kepada Tarif Perdagangan Voltan Rendah (Tarif B), Tarif Perdagangan Am Voltan Sederhana (Tarif C1) ataupun Tarif Perdagangan Puncak/Luar Puncak Voltan Sederhana (Tarif C2). Penetapan kadar tarif ini bergantung kepada paras voltan dan profail beban yang diisytiharkan oleh mereka semasa membuat permohonan bekalan elektrik daripada TNB.
2. Kebanyakan sekolah adalah di bawah Tarif B manakala kebanyakan premis Kerajaan diletakkan di bawah Tarif C1. Pengguna Tarif B dikenakan kadar tarif sebanyak 43.50 sen/kWj bagi penggunaan

200kWj pertama dan 50.90 sen/kWj bagi setiap unit seterusnya. Kadar ini lebih tinggi berbanding kadar Tarif C1 sebanyak 36.50 sen/kWj bagi semua kWj.

3. Walau bagaimanapun, pengguna Tarif C1 turut dikenakan caj kehendak maksimum dengan kadar RM30.30/kW sebulan selain caj minimum bulanan sebanyak RM600 berbanding Tarif B yang tiada caj kehendak maksimum dan caj minimum bulanan hanya RM7.20 sahaja.
4. Oleh itu, sekiranya Kerajaan melaraskan tarif sekolah yang dikenakan Tarif B kepada Tarif C seperti mana yang dinikmati oleh bangunan Kerajaan lain, ia harus mengambil kira caj kehendak maksimum yang dikenakan terhadap pengguna di bawah kategori Tarif C1. Kadar purata Tarif C1 dengan caj kehendak maksimum ialah 44.60 sen/kWj berbanding dengan 36.50 sen/kWj tanpa kehendak maksimum. Oleh itu, tarif bagi sekolah perlu dilaraskan kepada 44.60 sen/kWj untuk semua unit berbanding tarif sedia ada iaitu 43.50 sen/kWj bagi penggunaan 200kWj pertama dan 50.90 sen/kWj bagi setiap unit seterusnya dan ini akan menyebabkan kadar tarif bagi sekolah menjadi lebih tinggi berbanding kadar tarif yang dikenakan pada masa ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : Lisan

**DARIPADA : Dato' Dr. Noraini Ahmad
[Parit Sulong]**

TARIKH : 4 Disember 2018

SOALAN NO. 23 :

Dato' Dr. Noraini Ahmad [Parit Sulong] minta **MENTERI PERTANIAN DAN INDUSTRI ASAS TANI** menyatakan jumlah terkini usahawan tani yang telah dibantu bagi memasarkan produk masing-masing secara langsung kepada pembeli melalui program MyBest Buy FAMA serta apakah program ini juga turut dapat mempengaruhi harga barangan runcit di pasar-pasar yang berhampiran.

JAWAPAN

Tuan Yang Dipertua,

Sehingga 1 Oktober 2018, terdapat seramai 2,746 usahawan tani yang telah terlibat dalam Program My Best Buy di seluruh Malaysia dengan memasarkan terus hasil pertanian kepada pengguna. Ia dilaksanakan di 148 lokasi di seluruh negara dengan nilai jualan bagi tempoh Januari hingga September 2018 telah mencatatkan nilai sebanyak RM8.6 juta.

Secara umumnya, produk-produk My Best Buy yang dijual adalah 5 peratus hingga 20 peratus lebih rendah dari harga di pasar-pasar awam seluruh negara dapat memberi penjimatan kepada pengguna. Program ini sedikit sebanyak turut mempengaruhi harga pasaran beberapa komoditi seperti minyak masak di pasaran setempat. Walau bagaimanapun, program ini bukanlah bertujuan untuk bersaing dengan pasaran setempat sedia ada.

PEMBERITAHUAN PERTANYAAN MESYUARAT KEDUA,
PENGGAL PERTAMA, PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN SANISVARA NETHAJI RAYER A/L RAJAJI
(JELUTONG)

TARIKH : 4 DIS 2018 (SELASA)

SOALAN:

Minta **MENTERI PERTAHANAN** menyatakan apakah tahap kesiapsiagaan tentera kita menghadapi ancaman luar negara,terutamanya kesiapsiagaan jet-jet pejuang tentera udara diraja Malaysia.

JAWAPAN:

Tuan Yang di-Pertua,

Tentera Udara Diraja Malaysia (TUDM) merupakan salah satu angkatan bersenjata didalam ATM yang dipertanggungjawabkan untuk menjaga kedaulatan ruang udara negara dari dicero bohi oleh apa jua elemen luar. Oleh sebab itu, tahap kesiapsiagaan kesemua aset tempur TUDM sentiasa diletakkan di dalam tahap kesediaan yang tinggi dan mampu untuk bertindak pada sebarang masa. Jet-jet pejuang TUDM sentiasa diletakkan dalam keadaan bersiap-sedia atau "*Readiness Condition*" (REDCON) secara berperingkat bergantung kepada situasi keselamatan semasa supaya sebarang ancaman atau pencerobohan dari udara dapat dipintas dengan segera. Peranan ini dilakukan pada sebarang masa bagi memastikan kedaulatan dan keselamatan ruang udara sentiasa terpelihara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN PRABAKARAN A/L M PARAMESWARAN
[BATU]**

TARIKH : 04 DISEMBER 2018 (SELASA)

SOALAN NO. 25

Minta **MENTERI HAL EHWAL EKONOMI** menyatakan adakah Kementerian mempunyai cadangan untuk menaikkan pengukuran Pendapatan Garis Kemiskinan (PGK) agar lebih banyak bantuan dapat diberikan kepada mereka yang berpendapatan rendah terutamanya penduduk di dalam kawasan bandar.

JAWAPAN

Yang di-Pertua,

Untuk makluman Ahli Yang Berhormat, Pendapatan Garis Kemiskinan (PGK) dikemas kini setiap kali Kerajaan menerbitkan laporan Penyiasatan Pendapatan Isi Rumah dan Kemudahan Asas (PPIR & KA). Penyiasatan ini dilaksanakan dua kali dalam tempoh lima tahun. Laporan yang terkini diterbitkan pada tahun 2016 manakala laporan seterusnya akan diterbitkan pada tahun 2020.

PGK Mengikut Wilayah Dan Strata tersebut adalah seperti jadual dibawah:

PGK Mengikut Wilayah & Strata, Malaysia (RM)

	2014	2016
Malaysia	950	980
Bandar	960	990
Luar bandar	910	930
Semenanjung	930	960
Bandar	940	970
Luar bandar	870	880
Sabah	1,170	1,180
Bandar	1,160	1,170
Luar bandar	1,180	1,220
Sarawak	990	1,020
Bandar	1,040	1,070
Luar bandar	920	9,40

Sumber: Penyiasatan Pendapatan Isi Rumah dan Kemudahan Asas, 2014 & 2016

Kerajaan akan mengkaji semula model PGK yang digunakan supaya lebih mencerminkan corak penggunaan dan kos sara hidup semasa. Ini termasuk mempertimbang sekiranya terdapat keperluan bagi menetapkan PGK mengikut bandar dan luar bandar di Semenanjung serta di Sabah dan Sarawak. Dengan kajian semula ini, semua isi rumah yang dikategorikan sebagai miskin, termasuk miskin bandar, akan layak mendapat bantuan yang diperlukan.

Dalam kajian ini, faktor-faktor selain daripada pendapatan seperti pendidikan, kesihatan dan taraf hidup akan diteliti dalam menghasilkan indeks kemiskinan yang baharu. Indeks ini dinamakan MPI akan memberikan tafsiran yang lebih baik bagi isi rumah miskin dan miskin tegar serta lebih bersasar.

Sekian, terima kasih.

4 Disember 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

TARIKH : 4 DISEMBER 2018 (SELASA)

SOALAN NO. 26

Minta **MENTERI PENDIDIKAN** menyatakan implikasi penukaran fungsi sembilan buah IPG kepada Kolej Vokasional khususnya terhadap perkembangan profesionalisme guru-guru di Malaysia.

JAWAPAN

Yang di-Pertua,

Institut Pendidikan Guru (IPG) merupakan satu-satunya institusi latihan perguruan bagi bekalan guru sekolah rendah. IPG juga menjalankan latihan kepada guru dalam perkhidmatan.

Untuk makluman Ahli Yang Berhormat, Kerajaan telah memutuskan bahawa sembilan (9) kampus IPG yang dicadangkan untuk tukar fungsi ke institusi Pendidikan Teknikal dan Latihan Vokasional (TVET) dikekalkan fungsinya menjadi pusat latihan dalam perkhidmatan (*Continuous Professional Development*). Semua sembilan (9) kampus IPG yang dicadangkan untuk tukar fungsi ke institusi TVET dan IPG Kampus Raja Melewar juga berstatus secara Wujud Bersama (*Co-Exist*) dengan Kolej Vokasional/Politeknik dan PERMATApintar.

Maksud Wujud Bersama mengikut persetujuan dan terma rujukan yang dipersetujui oleh kedua-dua belah pihak adalah seperti berikut:

1. pewujudan dua (2) entiti dalam premis yang sama;
2. persempadanan fizikal (*demarcation*) yang jelas bagi kedua-dua entiti;
3. pengkhususan infrastruktur dan infrasumber kepada dua entiti;
4. penggunaan infrastruktur dan infrasumber secara guna sama;
5. pemberatan pembahagian kedua-dua entiti berdasarkan kompleksiti, kapasiti dan keperluan; dan
6. kesesuaian melaksanakan fungsi sedia ada dan fungsi baharu institusi.

Sekian, terima kasih

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : TUAN HAJI WAN HASSAN BIN MOHD
RAMLI
[DUNGUN]**

TARIKH : 4 DISEMBER 2018 (SELASA)

SOALAN : 27

minta **MENTERI PEMBANGUNAN LUAR BANDAR** menyatakan Pelan Induk pembangunan Lembaga Kemajuan Terengganu Tengah (KETENGAH).

JAWAPAN:

Tuan Yang Di-Pertua,

Untuk makluman Yang Berhormat, Lembaga Kemajuan Terengganu Tengah telah ditubuhkan secara rasmi pada 12 April 1973 melalui Akta Parlimen. Sejak dari penubuhannya, KETENGAH telah melalui tiga (3) Fasa Pelan Induk Pembangunan bermula tahun 1973 hingga 2010.

Pada masa sekarang, KETENGAH sedang melalui Pembangunan Fasa Keempat iaitu bagi tahun 2011 hingga 2020 yang juga berasaskan kepada 4 Teras Pembangunan Strategik Pembangunan KETENGAH yang memberi fokus kepada:

a. Pembangunan Usahawan

Dalam usaha untuk melahirkan dan memperkasakan usahawan luar bandar yang berdaya maju dan berdaya saing, Ketengah telah mengsektorkan bidang keusahawan ini kepada 3 sektor iaitu sektor Agroternak, Agrotani dan Usahawan IKS.

Sektor Agroternak melibatkan penternakan lembu, kerbau, ayam pedaging, ayam kampung, puyuh pedaging dan ikan air tawar. Seramai 89 orang peserta terlibat dalam sektor ini dan memperolehi pendapatan antara RM1,500 hingga RM3,000 sebulan.

Sektor Agrotani pula melibatkan tanaman sayur-sayuran, nenas, lada hitam, tanaman kontang fertigasi dan buah-buahan. Seramai 39 orang peserta terlibat dengan memperolehi pendapatan antara RM1,000 hingga RM6,000 sebulan

Sektor ke-3 iaitu Usahawan IKS yang melibatkan pembangunan usahawan kecil dan sederhana yang terlibat dalam proses pembuatan, pemprosesan dan pembungkusan seperti kerepek pisang, rempeyek dan minuman. Sektor ini juga memproses dan membungkus hasil Agroternak seperti pemprosesan ayam pedaging dan puyuh pedaging. Bidang Perkhidmatan, Automotif, Pembinaan, Kesejahteraan dan Gaya Hidup juga disektorkan

dibawah Keusahawan IKS. Seramai 358 orang peserta terlibat dan memperolehi pendapatan antara RM3,000 hingga RM4,000 sebulan.

b. Pembangunan Kesejahteraan Rakyat dan Peningkatan Pendapatan

Pembangunan Kesejahteraan Rakyat melibatkan Program Bantuan Rumah (PBR) kepada golongan Rakyat Termiskin yang terdiri Projek Perumahan Bina Baru dan Projek Baik Pulih Rumah. Program ini melibatkan 1,083 peserta dengan peruntukan berjumlah RM20 juta.

Program Peningkatan Pendapatan yang telah dilaksanakan iaitu Program Latihan Kemahiran dan Kerjaya (PLKK), Program Peningkatan Pendapatan (PPP) dan Program Peningkatan Modal Insan (PPMI) yang melibatkan seramai 1,305 orang peserta dari kalangan isi rumah dalam senarai e-Kasih. Daripada jumlah ini, peratusan yang telah mendapat peluang pekerjaan adalah 85%. Program ini melibatkan peruntukan sejumlah RM12 juta.

c. Pembinaan Rumah dan Premis Perniagaan

Pembinaan rumah dan premis perniagaan kepada rakyat dalam kawasan KETENGAH telahpun bermula sejak awal pembukaan KETENGAH lagi. Walau bagaimanapun, Pembinaan Rumah dan Premis Perniagaan dalam fasa keempat ini lebih menekankan kepada Perumahan dan Premis Perniagaan yang lebih berkualiti dan memenuhi keperluan semasa serta mampu milik.

KETENGAH sehingga kini telah membina sejumlah 4,063 buah rumah dalam Perbandaran dan membina sejumlah 486 buah premis perniagaan dalam wilayah KETENGAH dengan peruntukan berjumlah RM52.5 juta.

Bagi memenuhi keperluan perumahan selanjutnya, KETENGAH akan membina sejumlah 1,180 unit rumah dan 10 unit premis perniagaan.

d. Pembangunan Infrastruktur dan Infostruktur

Pembangunan Infrastruktur melibatkan pembinaan jalan-jalan dan kemudahan awam atau Ameniti Sosial dalam wilayah KETENGAH termasuk program Bekalan Air Luar Bandar (BALB), Bekalan Elektrik Luar Bandar (BELB), Jalan Luar Bandar (JALB), Jalan Perhubungan Desa (JPD) dan Jalan Jejari dan Taman.

Jalan-jalan yang dibina bertujuan untuk memudahkan perhubungan penduduk disamping memudahkan mereka membawa keluar hasil pertanian yang diusahakan. Ia termasuk juga bekalan air bersih kepada penduduk melalui program BALB dan bekalan elektrik 24 jam melalui program BELB.

Penyediaan kemudahan bekalan air dan elektrik dalam wilayah KETENGAH yang meliputi 3 kawasan Parlimen, 14 mukim dan 5 perbandaran telah dilengkapi 100% dengan Bekalan Air Luar Bandar (BALB) dan Bekalan Elektrik Luar Bandar (BELB).

Bagi Pembangunan Infostruktur ICT pula, projek atau program yang telah dilaksanakan adalah pembangunan 30 Pusat Komuniti Desa (PKD) dalam wilayah KETENGAH serta penyediaan kemudahan talian internet di setiap PKD. Kemudahan talian internet dan Wifi untuk kegunaan pelancong dan orang ramai di Pengkalan Gawi, Tasik Kenyir dengan kelajuan 5Mbps setiap rangkaian.

KETENGAH juga telah menyediakan latihan dan kemahiran komputer kepada penduduk dalam wilayah KETENGAH serta membangunkan Sistem Maklumat Usahawan bagi tujuan pengurusan dan pemasaran produk usahawan. Peruntukan bagi Infostruktur ini melibatkan sejumlah RM8.31 juta.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN ARTHUR JOSEPH KURUP
[PENSIANGAN]**

TARIKH : 4 DISEMBER 2018 (SELASA)

SOALAN NO. 28

Minta **MENTERI PERUMAHAN DAN KERAJAAN TEMPATAN** menyatakan **bilakah** jangkaan Balai Bomba Pekan Sook dijangka **siap** dan akan mula beroperasi.

JAWAPAN :-

Yang di-Pertua,

1. Untuk makluman Yang Berhormat, projek pembinaan Balai Bomba dan Penyelamat Sook sedang dalam pembinaan dan telah **97% siap**. Projek ini dijangka akan siap pada **akhir tahun 2018** dan akan mula beroperasi pada awal tahun 2019 sebaik sahaja projek diserahkan oleh Bahagian Pembangunan dan Pelaksanaan Projek (BPem) Kementerian Perumahan dan Kerajaan Tempatan (KPKT) ke Jabatan Bomba dan Penyelamat Malaysia (JBPM).
2. Pada masa ini, kawasan **Sook** mendapat perlindungan kebakaran dari **Balai Bomba dan Penyelamat Keningau** dengan jarak perjalanan sejauh **40 kilometer**. Pada masa ini seramai **21 orang anggota Bomba Bantuan** telah dilantik untuk bertugas di Balai Bomba dan Penyelamat Sook dan sedang menjalani latihan di Balai Bomba dan Penyelamat Keningau.
3. Dengan beroperasinya Balai Bomba dan Penyelamat Sook kelak, penduduk di kawasan Sook akan mendapat perkhidmatan kebombaanan dengan **response time di bawah 10 minit**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN SYED IBRAHIM BIN SYED NOH
[LEDANG]
TARIKH : 04 DISEMBER 2018 (SELASA)

SOALAN NO. 29

Y.B. TUAN SYED IBRAHIM BIN SYED NOH [LEDANG] minta **MENTERI KEWANGAN** menyatakan tindakan Kerajaan dalam memastikan 121,429 syarikat dan individu yang tidak menerima bayaran balik GST yang berjumlah RM19.4 bilion, akan menerimanya.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah memperuntukkan sebanyak RM37 bilion untuk mengembalikan semula tunggakan cukai pendapatan dan cukai input GST pada tahun 2019 seperti yang telah diumumkan di dalam Belanjawan 2019. Peruntukan yang telah diumumkan ini menunjukkan bahawa Kerajaan komited untuk membayar tunggakan GST kepada syarikat-syarikat yang terlibat. Pembayaran balik cukai input GST akan dibuat oleh Jabatan Kastam Diraja Malaysia (JKDM) mulai tahun hadapan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB. DATO' HAJI JALALUDDIN BIN HAJI
ALIAS [JELEBU]**

TARIKH : 4 DISEMBER 2018

SOALAN :

Minta **MENTERI PELANCONGAN, SENI DAN BUDAYA** menyatakan berapakah jumlah syarikat yang mengendalikan pakej pelancongan domestik telah menerima manfaat daripada Program Galakan Cukai, dan berapakah jumlah pengecualian cukai yang terlibat.

JAWAPAN :

Tuan Yang di-Pertua,

Kementerian Pelancongan, Seni dan Budaya sentiasa prihatin dalam membantu pengusaha syarikat pelancongan di Malaysia dengan memperkenalkan insentif pengecualian cukai pendapatan menerusi Lembaga Hasil Dalam Negeri (LHDN).

Kementerian memberi surat sokongan kepada syarikat pelancongan yang memenuhi syarat-syarat pengecualian cukai seperti berikut:-

1. Pengusaha syarikat pelancongan di Malaysia yang mengendalikan Pakej Pelancong Asing melebihi 750 orang dan/atau Pakej Pelancong Domestik melebihi 1,500 orang;
2. Pengusaha syarikat pelancongan tersebut perlu berdaftar dengan Kementerian ini di bawah Akta Industri Pelancongan 1992 (Akta 482); dan
3. Mendapat pengesahan daripada Juru Audit Awam yang bertauliah.

Jumlah syarikat pelancongan yang telah mendapat surat sokongan dari tahun 2015 sehingga September 2018 adalah sebanyak 465 syarikat. Manakala syarikat pelancongan yang mendapat kelulusan pengecualian cukai pendapatan adalah tertakluk kepada keputusan akhir oleh LHDN.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 4 DISEMBER 2018 (SELASA)

SOALAN NO. 32

Minta **MENTERI PERTANIAN DAN INDUSTRI ASAS TANI** menyatakan langkah-langkah yang telah diambil dan sedang dirancang oleh Kementerian untuk mengatasi masalah benih padi supaya hasil padi dapat ditingkatkan dan masalah-masalah berkaitan benih padi dapat diselesaikan.

JAWAPAN

Tuan Yang Dipertua,

Antara langkah-langkah yang telah diambil dan sedang dirancang oleh Kementerian untuk mengatasi masalah benih padi supaya hasil padi dapat ditingkatkan dan masalah berkaitan benih padi dapat diselesaikan ialah:

- (i) melaksanakan Skim Pengesahan Benih Padi sejak tahun 2007. Tujuan utama skim ini adalah untuk memperakukan ketulenan genetik dan identiti varieti benih padi yang dikeluarkan oleh syarikat pengeluar benih padi sah;
- (ii) melaksanakan penyelidikan dan pembangunan (R&D) secara berterusan melalui pengenalan kepada varieti benih baru untuk meningkatkan hasil dan rintang (tahan) kepada penyakit;
- (iii) memperuntukan sebanyak RM75 juta pada setiap tahun bagi memastikan benih padi berkualiti dibekalkan kepada pesawah melalui penggunaan benih padi sah;
- (iv) mewujudkan penguatkuasaan dan peraturan pelesenan kepada pengeluar-pengeluar benih padi di seluruh negara;
- (v) penggunaan QR CODE pada beg benih padi sah sebagai mekanisme untuk mengesahkan bahawa benih tersebut adalah sah jika maklumat dalam scanner sama seperti dalam label; dan
- (vi) sedang merangka Rang Undang-Undang Kualiti Benih Tanaman bagi mengawal selia benih padi dan tanaman-tanaman lain supaya patuh dan menepati standard dan tahap ketulenan yang ditetapkan.

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TAN SRI NOH BIN HAJI OMAR
[TANJONG KARANG]

TARIKH : 4 DISEMBER 2018
MENJAWAB

SOALAN : 33

YB TAN SRI NOH BIN HAJI OMAR [TANJONG KARANG] minta **PERDANA MENTERI** menyatakan apakah justifikasi yang dibuat oleh Jabatan Peguam negara dalam penarikan balik kes melibatkan Menteri Kewangan dan adakah benar Peguam Negara tidak terlibat dalam membuat keputusan.

JAWAPAN: YB TUAN MOHAMED HANIPA BIN MAIDIN

TIMBALAN MENTERI

DI JABATAN PERDANA MENTERI

Tuan Yang di-Pertua,

1. Perkara 145 Perlembagaan Persekutuan memperuntukkan kuasa kepada Peguam Negara untuk memulakan, menjalankan atau memberhentikan apa-apa prosiding bagi apa-apa kesalahan jenayah menurut budi bicaranya.
2. Subseksyen 376(1) Kanun Tatacara Jenayah [*Akta 593*] pula memperuntukkan kuasa kepada Peguam Negara selaku Pendakwa Raya untuk mengawal dan memberikan arahan dalam semua pendakwaan jenayah dan prosiding di bawah Kanun Tatacara Jenayah.
3. Selanjutnya, subseksyen 376(3) Kanun Tatacara Jenayah memperuntukkan bahawa Pendakwa Raya boleh melantik Timbalan Pendakwa Raya yang hendaklah tertakluk kepada kawalan dan arahan Pendakwa Raya dan boleh melaksanakan

semua atau mana-mana hak dan kuasa Pendakwa Raya kecuali kuasa-kuasa yang dinyatakan untuk dilaksanakan oleh Pendakwa Raya sendiri.

4. Peguam Negara tidak tertakluk kepada apa-apa keputusan Kerajaan dalam memulakan, menjalankan, atau memberhentikan apa-apa prosiding bagi sesuatu kesalahan.
5. Berhubung dengan penarikan balik kes Bagan, Peguam Negara tidak terlibat secara langsung atau tidak langsung dalam membuat keputusan tersebut. Sebaliknya, keputusan tersebut telah dibuat oleh Ketua Bahagian Perbicaraan dan Rayuan, Jabatan Peguam Negara yang tidak terlibat dalam pengendalian perbicaraan tersebut sebelum ini.
6. Keputusan dibuat setelah mengkaji representasi peguam bela YB Bagan tanpa sebarang campur tangan daripada mana-mana pihak.
7. Representasi yang dikemukakan telah dikaji menggunakan "*fresh eye technique*". Setelah meneliti keseluruhan keterangan dalam

kertas siasatan dan keterangan yang dikemukakan yang telah dicabar melalui pemeriksaan balas ke atas saksi-saksi pendakwaan yang telah memberikan keterangan, adalah didapati bahawa keterangan untuk membuktikan pertuduhan di bawah seksyen 23 Akta Suruhanjaya Pencegahan Rasuah [Akta 694] dan di bawah seksyen 165 Kanun Keseksaan [Akta 574] adalah lemah dan tidak mencukupi untuk membuktikan kes di akhir kes pendakwaan.

8. Berdasarkan dapatan tersebut, kes tersebut adalah tidak wajar untuk diteruskan.
9. Keputusan melepaskan dan membebaskan YB Lim Guan Eng daripada pertuduhan salah laku pada peringkat kes pendakwaan telah dibuat selaras dengan kuasa yang yang diperuntukkan oleh Perlembagaan Persekutuan dan Kanun Tatacara Jenayah.
10. Oleh yang demikian, tindakan tersebut tidak menyentuh integriti dan kredibiliti Kerajaan kerana semua tindakan dibuat berlandaskan peruntukan undang-undang dan mengikut *Rule of Law*. Sekian, terima kasih.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

DARIPADA : YB PUAN HAJAH SITI ZAILAH BINTI MOHD YUSOFF [RANTAU PANJANG]

TARIKH : 4 DISEMBER 2018 (KHAMIS)

SOALAN :

Puan Hajah Siti Zailah binti Mohd Yusoff [Rantau Panjang] minta **PERDANA MENTERI** menyatakan apakah tindakan Kerajaan bagi memastikan SUHAKAM, COMANGO dan badan hak asasi manusia yang lain tidak bertindak menuntut hak yang bercanggah dengan hukum syarak dan mencabar kedudukan Islam sebagai agama Persekutuan.

JAWAPAN : **(YB DATUK SERI DR MUJAHID YUSOF, MENTERI DI JABATAN PERDANA MENTERI)**

Tuan Yang di-Pertua,

Perkara 3 (1) Perlembagaan Persekutuan telah memperuntukkan Islam sebagai agama bagi persekutuan, maka segala prinsip-prinsip akidah dan syariat yang menjadi dasar kepada negara ini, haruslah berlandaskan pandangan Islam.

Islam sendiri tidak pernah menentang perjuangan hak asasi yang bertujuan membebaskan manusia dari belenggu kezaliman dan penindasan bahkan

menjuarai dalam isu-isu hak asasi manusia. Sifat Islam sebagai agama universal, *rahmatan lil 'alamin* jelas membuktikan kedatangan Islam itu sendiri yang 'membebaskan' seluruh umat manusia dari belenggu kejahilan yang mengakibatkan bermacam kezaliman dan penindasan. Perjuangan Islam yang mengangkat darjat persamaan, kebebasan dan penghormatan ini terzahir melalui idea persamaan manusia tanpa mengira bangsa, kaum dan agama, hak kepada keadilan, kebebasan individu, hak asasi golongan tertentu seperti wanita, kanak-kanak, pelarian, tawanan perang dan lain-lain.

Kerajaan menolak perjuangan hak asasi yang meletakkan kedudukan manusia pada posisi paling tinggi berbanding perintah Tuhan serta tuntutan-tuntutan yang bertentangan dengan nilai-nilai murni khususnya kepada umat Islam di negara ini dan menjadi ancaman dari segi akidah dan syariah bagi menjamin perpaduan umat Islam dan kaum di Malaysia yang selama ini hidup dengan aman dan damai.

Malaysia sebagai negara anggota Pertubuhan Negara Islam (OIC), turut tertakluk kepada Deklarasi Kaherah Mengenai Hak Asasi Dalam Islam 1990 atau **Cairo Declaration on Human Rights in Islam (CDHRI)**. Walau apapun tuntutan atas nama hak asasi manusia oleh mana-mana organisasi dan pertubuhan, tuntutan tersebut hendaklah tidak bercanggah dengan syariat Islam dan Perlembagaan Persekutuan kerana Malaysia merupakan sebuah negara Islam dan bukan sebuah negara minoriti Muslim.

Sekian, terima kasih.

PEMBERITAHUAN PERTANYAAN BAGI JAWAPAN BAGI SOALAN
LISAN MESYUARAT KEDUA, PENGGAL PERTAMA,
PARLIMEN KEEMPAT BELAS
MAJLIS MESYUARAT DEWAN RAKYAT
15 OKTOBER HINGGA 11 DISEMBER 2018

PERTANYAAN : LISAN

DARIPADA : Datuk Wilson Ugak Anak Kumbong [Hulu Rajang]

SOALAN :

Datuk Wilson Ugak Anak Kumbong [Hulu Rajang] minta **MENTERI INDUSTRI UTAMA** menyatakan pendekatan yang diambil oleh pihak Kementerian untuk mengatasi masalah penurunan harga komoditi seperti getah, lada dan kelapa sawit pada masa ini.

JAWAPAN

Tuan Yang di-Pertua,

Kementerian telah melaksanakan pelbagai inisiatif untuk menstabilkan harga komoditi seperti getah, lada dan kelapa sawit. Bagi sektor getah, Kementerian melaksanakan inisiatif-inisiatif berikut:

- (i) mengadakan kerjasama dengan Thailand dan Indonesia di bawah kerangka *International Tripartite Rubber Council* (ITRC). Antara langkah-langkah yang diambil oleh ITRC untuk mengukuhkan harga getah adalah seperti berikut:
 - (a) melaksanakan *Agreed Export Tonnage Scheme* (AETS) pada Januari hingga Mac 2018 yang mana tiga buah negara tersebut bersetuju untuk mengurangkan eksport getah asli sebanyak 350,000 tan; dan
 - (b) menubuhkan *Demand Promotion Scheme Committee* bertujuan untuk meningkatkan penggunaan getah dalam negara sebanyak

10% dan kerjasama dalam penyelidikan dan pembangunan (R&D) serta pertukaran maklumat terutamanya mengenai penggunaan *rubberised road* dipertingkatkan antara ketiga-tiga buah negara.

- (ii) melaksanakan Insentif Pengeluaran Getah (IPG) yang akan diaktifkan apabila harga purata bulanan getah menurun di bawah Paras Harga Pengaktifan (PHP) RM5.50 sekilogram atau purata bulanan harga ladang *cuplump* di paras RM2.20 sekilogram. Sebarang kekurangan harga daripada paras PHP akan ditampung oleh Kerajaan;
- (iii) melaksanakan mekanisme penetapan harga di ladang dengan menyediakan peruntukan sebanyak RM6.4 juta sebagai modal pusingan kepada koperasi-koperasi untuk tujuan urus niaga getah. Langkah ini dapat meningkatkan harga pembelian getah di peringkat ladang dengan mengurangkan lapisan pembeli; dan
- (iv) meningkatkan penggunaan getah dalam negara sebanyak 10% setahun, contohnya melalui penggunaan adunan getah dengan bitumen dalam pembinaan jalan raya dan lain-lain penghasilan barangan getah oleh pihak industri hiliran bagi melonjakkan permintaan terhadap getah tempatan. Peningkatan permintaan ini boleh menaikkan harga getah di peringkat ladang.

Tuan Yang di-Pertua,

Untuk komoditi lada pula, Kementerian telah mengambil langkah-langkah seperti berikut:

- (i) melaksanakan program untuk menggalakkan pekebun lada mengeluarkan lada berkualiti premium seperti Lada Putih Krim (LPK) dan Lada Berkualiti Eksport (LBE) bagi mendapatkan pulangan yang lebih lumayan berbanding menjual dalam bentuk lada mentah;
- (ii) menjual terus lada ke pasaran istimewa (*niche market*) dengan memperkenalkan beberapa produk lada tambah nilai di peringkat kilang seperti Lada Steril (*Mikrokleen*) dan serbuk lada untuk pasaran yang mementingkan keselamatan dan kualiti makanan. Setakat ini,

pasaran istimewa yang berjaya ditembusi ialah Jepun, Sweden, Korea Selatan, China, Amerika Syarikat, Taiwan, New Zealand dan Australia;

- (iii) mempelbagaikan produk berasaskan lada seperti sos lada hitam, minyak wangi lada, *smoke-flavoured seasoning*, *garlic pepper sauce*, dan *black pepper marinade cube*;
- (iv) menghasilkan *Sarawak Pepper* yang terkenal sebagai rempah ratus yang berkualiti dan menepati piawaian *ISO* dan *HACCP certified* serta memenuhi kehendak pelanggan di serata dunia. *Sarawak Pepper* di bawah Lembaga Lada Malaysia (MPB) telah memperolehi *Geographical Indications* (GI) yang bertujuan untuk menjaga nama dan imej jenama *Sarawak Pepper* sama ada di dalam mahu pun luar negara. Selain itu juga, bertujuan untuk memelihara *Sarawak Pepper* (*whole, ground, pickled*), produk lada tambah nilai dan produk berasaskan lada di Malaysia yang mempunyai harga premium di pasaran antarabangsa;
- (v) menjalinkan kerjasama dengan negara-negara pengeluar utama melalui *International Pepper Community* (IPC) untuk meneroka pasaran baharu bagi meningkatkan permintaan terhadap lada pada keseluruhannya; dan
- (vi) mengkaji mekanisme jaringan keselamatan bagi sektor lada yang melibatkan keseluruhan komuniti lada di Malaysia termasuk pihak industri, pekebun kecil dan Kerajaan.

Tuan Yang di-Pertua,

Bagi komoditi sawit pula, Kementerian telah melaksanakan beberapa strategi berikut:

- (i) mempergiatkan aktiviti penyelidikan dan pembangunan (R&D) serta memberi nilai tambah kepada produk hiliran komoditi sawit supaya negara dapat mengeksport lebih banyak produk-produk berasaskan sawit yang berkualiti tinggi. Langkah ini akan meningkatkan permintaan terhadap buah sawit tempatan;

SOALAN NO : 35

- (ii) menjadikan Skim Kemampanan Minyak Sawit Malaysia (MSPO) mandatori pada Disember 2019 bagi mewujudkan sistem kemampanan yang diterima secara global. Ini akan membuka ruang pasaran yang lebih luas untuk pasaran minyak sawit mampan Malaysia di negara-negara pengimport;
- (iii) meningkatkan penggunaan domestik produk-produk komoditi sawit melalui Program Biodiesel daripada B7 kepada B10 yang telah dilaksanakan mulai November 2014 di seluruh negara. Langkah ini juga akan melonjakkan permintaan buah sawit tempatan; dan
- (iv) melipatgandakan usaha untuk mengeksport produk-produk sawit Malaysia ke pasaran antarabangsa dengan menjalankan aktiviti promosi produk-produk komoditi dan meningkatkan tahap kesedaran tentang kebaikan produk sawit negara serta menganjurkan aktiviti promosi bagi mengetengahkan produk komoditi keluaran syarikat dan pembekal tempatan. Kementerian juga turut membuat rundingan perjanjian perdagangan bebas (FTA) dua hala dan perundingan pelbagai hala atau serantau bagi meningkatkan akses pasaran yang lebih baik.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 4 DISEMBER 2018 (SELASA)

SOALAN NO. 36

Minta **MENTERI HAL EHWAL EKONOMI** menyatakan:

- a) berapakah jumlah keseluruhan projek Kerajaan terdahulu yang telah ditarik balik; dan
- b) apakah justifikasi Kerajaan untuk menarik balik projek yang telah diluluskan oleh Kerajaan terdahulu.

JAWAPAN

Tuan Yang di-Pertua,

Untuk makluman Ahli Yang Berhormat, konsisten dengan jawapan Kementerian ini pada mesyuarat penggal pertama Dewan Rakyat yang lalu, Kerajaan tidak berhasrat untuk menangguh atau membatalkan projek-projek pelaksanaan projek-projek yang memberikan manfaat terus kepada rakyat (people centric and high impact project) seperti jalan raya, jambatan, bekalan air, bekalan elektrik, keselamatan, kesihatan, sekolah dan rumah ibadat akan diteruskan. Projek-projek sebagainya akan diteruskan pelaksanaannya bagi memastikan kesejahteraan, keselamatan dan taraf hidup rakyat terpelihara terutamanya di kawasan luar bandar. Manakala projek-projek yang ditangguhkan dan dibatalkan pula merupakan projek mega kerana kemudahan sedia ada masih dapat memenuhi keperluan rakyat.

Pada tahun 2018, sebanyak 5,027 projek tersenarai untuk pelaksanaan dengan 4,946 projek yang diluluskan di bawah peruntukan Belanja Pembangunan (DE) sebanyak RM46 bilion. Setelah semakan dibuat, hanya satu projek dibatalkan dengan peruntukan berjumlah RM5 juta dan 278 projek pula ditangguhkan pelaksanaannya dengan peruntukan sebanyak RM1.767 bilion. Sebanyak 279 projek yang terlibat ini (dibatal/ditangguhkan) merupakan projek belum mula, yakni belum dikeluarkan Surat Setuju Terima (SST).

Selaras dengan keputusan Kerajaan agar kategori projek mengikut keutamaan yang memberikan manfaat terus kepada rakyat diteruskan, surat arahan Kementerian Kewangan bertarikh 29 Jun 2018 bertajuk Arahan Penambahbaikan Tadbir Urus Dan Pelaksanaan Perolehan Kerajaan tersebut telah menggariskan pematuhan untuk semakan semula projek seperti berikut:

- a) Projek-projek yang belum dikeluarkan SST dibatalkan atau ditangguhkan;
- b) Bagi projek-projek yang telah dikeluarkan SST, projek bernilai RM10 juta ke bawah boleh diteruskan; dan

- c) Bagi projek-projek yang telah dikeluarkan SST, projek bernilai RM10 juta ke atas boleh diteruskan dengan syarat kemajuan pelaksanaan tidak kurang 15%. Sekiranya di bawah 15%, projek hendaklah dikaji semula melalui *Contract Coordination Panel* (CCP) Kementerian pelaksana masing masing. CCP akan menimbang dan memutuskan kesesuaian pelaksanaan atau penamatan kontrak dengan mengambil kira jumlah pampasan yang perlu ditanggung oleh Kerajaan.

Untuk makluman Ahli Yang Berhormat, berdasarkan laporan sesi libat urus Contract Coordination Panel (CCP) Khas Kementerian bagi menyemak semula pelaksanaan projek tersebut sehingga 31 Oktober 2018, sebanyak 20 projek tidak diteruskan (kos RM3.87 bilion) dan 345 projek ditangguhkan (kos RM39.2 bilion) berbanding keseluruhan projek sebanyak 4,946 yang diluluskan di bawah Peruntukan Pembangunan (DE) tahun 2018.

Walau bagaimanapun, Kerajaan dari semasa ke semasa mengadakan semakan semula sama ada meneruskan semula, menangguh dan membatalkan pelaksanaan sesuatu projek di bawah Belanja Pembangunan berdasarkan keperluan, keutamaan pelaksanaan dan kemampuan kewangan Kerajaan masa akan datang.

Sekian, terima kasih
4 Disember 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN ANYI NGAU
[BARAM]
TARIKH : 4 DISEMBER 2018 (SELASA)

SOALAN NO. 37

Minta **MENTERI KESIHATAN** menyatakan rancangan Kementerian untuk membina sebuah hospital lengkap dengan kemudahan dan fasiliti terkini di Kawasan Baram. Nyatakan kelengkapan dan kemudahan yang disediakan di Klinik Kesihatan di kawasan pedalaman Sarawak.

JAWAPAN

Yang di-Pertua,

Buat masa ini terdapat sebuah hospital sedia ada di kawasan Baram iaitu Hospital Marudi dengan kapasiti **54** buah katil, menyediakan perkhidmatan pesakit dalam, perkhidmatan pesakit luar termasuk klinik lawatan pakar, hemodialisis, dan khidmat sokongan yang berkaitan.

Hospital ini memberi perkhidmatan perubatan kepada **65,400** penduduk dengan kadar penggunaan katil (*bed occupancy rate*) adalah 21.19% sahaja. Oleh itu, pada masa ini, keperluan perkhidmatan kesihatan dan perubatan penduduk setempat dapat ditampung oleh kemudahan hospital sedia ada. Bagi kes-kes yang memerlukan rujukan akan dihantar ke Hospital Miri.

Yang di-Pertua,

Penjagaan kesihatan primer menyediakan perkhidmatan kesihatan yang komprehensif meliputi aspek promotif, pencegahan, rawatan penyakit akut/kronik dan penyakit berjangkit/tidak berjangkit serta rehabilitasi merangkumi semua peringkat umur dari dalam kandungan hingga akhir hayat (*from womb to tomb*). Antara jenis perkhidmatan yang disediakan di klinik kesihatan adalah perkhidmatan pesakit luar, perkhidmatan kesihatan ibu dan anak (*maternal & child health*), rawatan susulan bagi penyakit kronik dan rawatan kecemasan asas termasuk perkhidmatan ambulan. Fasiliti Kesihatan di kawasan pendalaman turut dilawati (*visiting*) secara berkala oleh Pegawai Perubatan mahupun Pakar Perubatan Keluarga dari Klinik Kesihatan induk (*mother clinic*) bagi tujuan perkhidmatan kesihatan, rawatan dan audit klinikal. Jenis peralatan biomedikal yang terdapat di klinik kesihatan adalah tertakluk kepada skop perkhidmatan yang ditawarkan. Pada masa ini terdapat 129 kategori peralatan biomedikal disediakan di klinik kesihatan termasuk mesin ultrasound, mesin x-ray, biochemistry analyser dan sebagainya.

Bagi memastikan penyampaian perkhidmatan kesihatan yang menyeluruh termasuk di kawasan pedalaman, Kementerian Kesihatan Malaysia menyediakan sebanyak 251 pasukan kesihatan bergerak (*mobile health team*) yang merangkumi 12 pasukan Doktor Udara (*Flying Doctor Service*), 20 pasukan (7 bas dan 4 bot) Klinik Bergerak Malaysia (KBM) dan 219 pasukan Klinik Bergerak (206 pasukan melalui darat dan 13 pasukan melalui air) di seluruh Malaysia. Daripada 251 pasukan ini, 110 pasukan (43%) berada di negeri Sarawak termasuk di daerah Baram.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE DUA, PENGGAL PERTAMA,
PARLIMEN KE EMPATBELAS**

PERTANYAAN : LISAN

**DARIPADA : TUAN AHMAD MARZUK BIN SHAARY
[PENGKALAN CHEPA]**

TARIKH : 04 DISEMBER 2018

SOALAN : 38

Tuan Ahmad Marzuk bin Shaary [Pengkalan Chepa] minta **MENTERI DALAM NEGERI** menyatakan mengapa pihak polis hanya berjaya menangkap penjaga stor dan pekerja bawahan dalam kes-kes besar rampasan dadah di Kelantan. Apakah kekurangan PDRM yang dikenal pasti bagi membolehkan operasi memerangi dadah ini lebih berjaya di masa hadapan.

JAWAPAN:

Tuan Yang Di-Pertua,

Polis Diraja Malaysia (PDRM) sentiasa mempertingkatkan tindakan penguatkuasaan dalam mengekang aktiviti pengedaran dadah di negara dengan membuat tangkapan terhadap sindiket dan juga kepada individu yang dikenal pasti menjalankan aktiviti ini. Dalam perbicaraan kes pengedaran dadah, elemen pemilikan, pengetahuan dan kawalan dadah perlu dibuktikan di Mahkamah bagi mensabitkan tertuduh atas kesalahan tersebut.

Berkaitan tentang persoalan mengapa pihak polis hanya berjaya menangkap penjaga stor dan pekerja bawahan dalam kes-kes besar rampasan dadah di Kelantan, ia berkait rapat dengan beban pembuktian elemen pemilikan, pengetahuan dan kawalan dadah berkenaan semasa tangkapan dibuat memandangkan mereka yang ditangkap itu boleh dibuktikan mempunyai elemen-elemen berkenaan, sedangkan sindiket atau dalang tidak berada di tempat kejadian pada ketika itu dan sukar untuk membuktikan dadah berkenaan berada di bawah kawalannya. Namun demikian, jika terdapat keterangan lain yang menyokong bahawa terdapat penglibatan sindiket atau dalang dalam pengedaran dadah berkenaan, tindakan di bawah Akta Dadah Berbahaya (Langkah-langkah Pencegahan Khas) 1985 akan diambil terhadap mereka.

Antara kesukaran yang dihadapi oleh PDRM untuk menghapuskan sindiket-sindiket atau dalang-dalang pengedaran dadah dalam negara berdasarkan faktor-faktor berikut:

- i) Tidak semua ketua sindiket atau dalang terdiri daripada rakyat tempatan, ia turut melibatkan warga asing yang tidak diketahui identiti oleh pekerja bawahan yang menguruskan semua urusan pengedaran dadah berkenaan. Kebanyakan daripada ketua sindiket ini hanya memberikan arahan secara langsung

menggunakan orang perantaraan yang paling dipercayai untuk menguruskannya.

- ii) Sindiket atau dalang menggunakan pelbagai “Modus Operandi” dan sentiasa berubah-ubah dalam menyeludup atau mengedarkan dadah berkenaan seperti membawa masuk tukang masak dadah dari luar negara dan memproses dalam negara melalui makmal haram yang dibina atau menggunakan khidmat syarikat penghantaran menggunakan alamat yang palsu. Pengedaran dadah secara konvensional dengan membawa masuk dadah yang siap diproses tidak lagi menjadi pilihan sindiket kerana mudah dikesan oleh pihak berkuasa.
- iii) Sindiket menggunakan khidmat “keldai dadah” kebiasaannya terdiri daripada kaum wanita untuk membawa dadah berkenaan dengan menawarkan pakej percutian di luar negara yang mahal atau diberikan imbuhan kewangan yang lumayan dan tanpa disedari mereka sebenarnya dipergunakan oleh sindiket untuk membawa dadah bersama mereka.
- iv) Kemunculan dadah jenis baru seperti *Amphetamine Type Stimulants (ATS)* dan *New Psychoactive Substances (NPS)* yang menyerupai pil-pil perubatan dari segi saiz dan warna menyukarkan pihak penguatkuasa mengesan dadah berkenaan. Hanya mereka yang betul mahir saja dapat membezakannya.

Namun demikian pihak PDRM tidak berputus asa untuk mengekang aktiviti pengedaran dan penyalahgunaan dadah dalam negara dengan mengambil langkah-langkah tertentu seperti menjalin kerjasama dengan Universiti Sains Malaysia dalam berkongsi maklumat bagi kajian dan siasatan kegiatan pengedaran dadah dan *New Psychoactive Substances (NPS)* dan membangunkan *System Technical Drug Crime Analytics* bagi mengkaji semua aspek berkaitan dadah dalam negara.

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

**DARIPADA : YB DATIN MASTURA BINTI MOHD YAZID
[KUALA KANGSAR]**

TARIKH : 4 DISEMBER 2018 (SELASA)

SOALAN:

Datin Mastura binti Mohd Yazid [Kuala Kangsar] minta PERDANA MENTERI menyatakan apakah pendirian Kementerian mengenai fahaman Syiah di Malaysia.

**JAWAPAN : (YB DATUK SERI DR MUJAHID YUSOF,
MENTERI DI JABATAN PERDANA MENTERI)**

Tuan Yang Di-Pertua,

Muzakarah Khas Jawatankuasa Fatwa Majlis Kebangsaan Bagi Hal Ehwal Ugama Islam Malaysia yang bersidang pada 5 Mei 1996 telah membincangkan Syiah Di Malaysia. Muzakarah telah memutuskan bahawa:

1. Bersetuju supaya keputusan Muzakarah Jawatankuasa Fatwa yang telah diadakan pada 24 dan 25 September 1984 [Kertas Bil. 2/8/84, Perkara 4.2. (2)] mengenai aliran Syiah yang menetapkan seperti berikut: “Setelah berbincang dan menimbang kertas kerja ini Jawatankuasa telah mengambil keputusan bahawa hanya Mazhab Syiah dari golongan Al – Zaidiyah dan Jaafariah sahaja yang diterima untuk diamalkan di Malaysia.” dimansuhkan.
2. Menetapkan bahawa umat Islam di Malaysia hendaklah hanya mengikut ajaran Islam yang berasaskan pegangan Ahli Sunnah Wal Jamaah dari segi Aqidah, Syariah dan Akhlak.
3. Menyokong dan menerima cadangan pindaan Perlembagaan Persekutuan dan Perlembagaan Negeri–Negeri bagi memperuntukkan dengan nyata bahawa agama bagi Persekutuan dan Negeri–Negeri hendaklah agama Islam berasaskan pegangan Ahli Sunnah Wal Jamaah dari segi Aqidah, Syariah dan Akhlak.
4. Memperuntukkan pindaan kepada semua Undang–Undang Negeri dan Hukum Syarak bagi menyelaraskan takrif hukum Syarak atas Undang- Undang Islam seperti berikut :” Hukum Syarak atau Undang–Undang Islam ertinya Undang–Undang Islam yang berasaskan pegangan Ahli Sunnah Wal Jamaah dari segi Aqidah, Syariah dan Akhlaq.”

5. Memperakukan bahawa ajaran Islam yang lain daripada pegangan Ahli Sunnah Wal Jamaah adalah bercanggah dengan Hukum Syarak dan Undang–Undang Islam dan demikian penyebaran apa–apa ajaran yang lain daripada pegangan Ahli Sunnah Wal Jamaah adalah dilarang.
6. Menetapkan bahawa semua umat Islam di negara ini adalah tertakluk kepada undang–undang Islam Hukum Syarak yang berasaskan pegangan kepada ajaran Ahli Sunnah Wal Jamaah sahaja.
7. Menetapkan bahawa penerbitan, penyiaran dan penyebaran apa-apa buku, risalah, filem, video dan lain–lain berhubung dengan ajaran Islam yang bertentangan dengan pegangan Ahli Sunnah Wal Jamaah adalah diharamkan.

Keputusan Jawatankuasa Fatwa Majlis Kebangsaan ini kemudiannya telah disusuli dengan fatwa pengharaman Syiah di 13 buah negeri di Malaysia dan fatwa ini telah pun diwartakan kecuali di Sarawak.

Sekian, terima kasih.